

ASO LULU, 19 IANUARI 2022

Na nofoia e le Fofoga Fetalai le Nofoa i le itula e 9:26 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaofa Fautulafono.

O lea ua faataualofa le malama sa sufi ma le piieleele na momoli e le sulu ma le aupolapola, ua sopo foi le autapale i uluauma ina ua malaga le uto i le au saafi o le taliuta. Viia le Atua i Lona alofa ma Lona agalelei ua tatou toe fesilafai i le manuia mai ia te Ia.

E ofo alofa ma faatalofa atu ai i lenei taeao fou i le paia o le Palemene i ona mamalu faalagia. I le afio o lau Afioga i le Tamaitai Palemia, le Sui Palemia ma le mamalu o le Kapeneta, faapea foi afioga i Minisita Lagolago.

Le paia o lea tala na atoa i le afio o lau afioga i le Sui Taitai, ia faapea foi le mamalu o lea Itu ma sui usufono uma o le Palemene.

Ua maleifua mai i faguga lelei i lenei taeao manino. Malo le soifua manuia i lo outou lagi e mama. E talitonu foi o lo o manuia le maleifua mai o le atunuu i lenei taeao i ou paia faaifogata, i le afio mai mauga tetele seia paia le fanau iti. E faatalofa ma ofo alofa atu lau Palemene i lo outou soifua manuia ma le lagi e mama.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a lo tatou Malo, malo le soifua manuia. Tatou lafoai i le Atua lenei aso e lelei ai. O Ia lava o le malamalama e tineia ai fagata o le tatou savaliga. Manuia le usugafono a le Palemene i lenei taeao, manuia le tapuaiga a Samoa i ona tulaga faalupe.

TUUIA ATU O PEPA

Na tolaulauina e le Failautusi i le Fono Aoaofa le faasologa o Pepa e tusa ai ma T.T.49(2).

1. P.P.2021/2022 Nu.30, Lipoti Faaletausaga a le Matagaluega o Aoga, Taaloga ma Aganuu, mo le Tausaga Faaletupe faaiuina i le aso 30 Iuni 2021.
2. P.P.2021/2022 Nu.31, Lipoti Faaletausaga a le Ofisa o le Pule Faatonu, mo le Tausaga Faaletupe faaiuina i le aso 30 Iuni 2021.

3. P.P.2021/2022 Nu.32, Lipoti Faaletausaga a le Matagaluega o Fesootaiga ma Faamatalaga Tekonolosi mo le Tausaga Faaletupe faaiiina i le aso 30 Iuni 2021.
4. P.P.2021/2022 Nu.33, Lipoti Faaletausaga a le Faaputugatupe o Faamanuiaga mo Tagatanuu Matutua o Samoa mo le Tausaga Faaletupe faaiiina i le aso 30 Iuni 2021.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2021/2022 – felafolafoaiga faaauau
i luga o le faitauga faalua – Aso 2**

FOFOGA FETALAI: E tolopo felafolafoaiga i le aso ananafi o lo o saunoa le sui usufono mo Aana Alofi Nu.2.

Ia, o le avanoa leni mo lau Afioga i le sui usufono mamalu e faaauau ai lau saunoaga.

Afioga AIONO TILE GAFA (Aana Alofi 2): Faafetai tele i lau Afioga i le Fofoga Fetalai mo le avanoa. E manatu foi leni usugafono e piitia foi le agaga faafetai i le Atua pei ona e momoli laau i Fogaa aua le viiga ma le faafetaia o le agalelei ma le alofa faaalua o le Atua ia Samoa ma leni galuega aua le Palemene, i le alafai mai o lau Afioga aemaise o le Afioga i le Taitai o le Malo le Afioga i le Tamaitai Palemia ma le Sui Palemia, le saofaiga mamalu foi aua le tou talaluma i Minisita o le Kapeneta ma le mamalu o usugafono i le Palemene aua Minisita Lagolago. Ia ae tainane leni Itu, i le matou Sui Taitai ma le mamalu o sui usufono tainane foi le paia lasilasi o le tatou Maota i Ofisa Sili o Pulega o Matagaluega ma Faalapotopotoga a le Malo aemaise foi le aufaigaluega a le tatou Ofisa o le Palemene. Malo faafetai, ua maua foi le avanoa e faaauau ai se matou tala aua tulaga o le Tala o le Tupe pei ona tatou i ai i lona faasologa.

Lau Afioga i le Fofoga Fetalai, e faaiu sau faamatalaga i le aso ananafi ua maea atu se isi ona vaega aua nisi o Afioga i Minisita o le Kapeneta. Ou te usu mai i leni taeao, e talitonu o le aso lava ma lona ai, ma e sau ma le fiafia ma le agaga faafetai. E moni ai upu a le atunuu, e tele lava upu i manu ae itiiti upu i mala. O le agaga faafetai lea i le galuega tau amata o le Palemene i leni tausaga.

Ae lau Afioga i le Minisita o Galuega, Felauaiga ma Atinae Eseeese a lo tatou Malo, e momoli atu le agaga faafetai i lau Afioga. E faigofie lava i le vaai, le matau, faapena foi ona iloa i le loto ma le mafaufau le faatinoga o lau galuega lau Afioga. Aua o le poututoa lea o le atinae o le tatou atunuu o tulaga tau galuega ma atinae eseeese. E momoli atu le faafetai i le onosai ma le lavapapale aua lau faasoa utiuti. Ae na o ni nai vaega ia o le matou itumalo lau Afioga e pei foi ona ou oo atu ma ta feiloai i lou ofisa, ona o matou auala

galue lava ia e fia faaleleia. O le auala lea i lou pitonuu lea e pito mai lava, e le i faia lava lea auala talu mai le amataga. E tau matamuli ai foi le lagona, ona o le taumafai e fai auala o isi itu o le matou itumalo i Faleasiu. Ae sa i ai le manatu e faamulimuli i le matou pitonuu, peitai ane ae ua le tau ia lagona. Ae manatu o le avanoa lenei ua toe maua ai lou avanoa i le Palemene ma ou valuvalusia ai aa o le fau i le tofa a lau Afioga, le auala lea e i i i le matou pitonuu lea e alu atu tonu lava i luga o le taufusi lea po o le vai lea pei ona ou talosagaina le afioga i le Minisita o Punaoa Faalenatura ma le Siosiomaga, lena lea o lo o taoto atu ai le matou auala lea. E alu lava e tau i uta i le mea lena o lo o i ai le falesa o le Ekalesia o le Au Paia o Aso e Gata ai, lea e pei ona tau amata mai ai le galuega.

Lau Afioga i le Minisita, atonu ou te le iloa po ua oo atu i ai sau asiasiga, ae le i i ai ma se galuega na faia, pau lava lea o le galuega sa tau faamataali mai uta. Ae o lea vaega o le matou nuu ma le itumalo, e toatele lava nai aiga o lo o papaaao ma nonofo ai. E tele aiga o lo o galulue ma atinae ai i faatoaga ma le gausia o le vao aua le atinaeina o aiga ma tautua foi Ekalesia ma fanau. O le tatalo atu lena lau Afioga a i ai lava se avanoa ma lau faasoa se i silasila ane i lea ala galue o le matou nuu.

O le isi auala lau Afioga, o le auala lea e le o se auala tele, le auala lea e i tala mai o le faleaoga e le mamao le alu i uta. E lagona lava le alofa i nai ia aiga. O le mafuaaga lau Afioga o le talosagaina o se fesoasoani mo lea auala, ona o la e pito lava i uta le malumalu, la e i ai le malumalu i gauta o le AOG. A oo ina gasolo sauniga ma tapuaiga faaleafiafi a le Ekalesia le susuga ia Farani, e ese le faigata. O le auala e tau ...e alofa isi a o tagata i o latou auala o lo o uia. Ae a oo foi i le po, o le matua pogisa lava, o le matua pogisa lava o le auala. A o le talosaga lena i lau Afioga, ia e alofagia, e le tele se auala, ou te iloa pe na o se 300 mita po o se tulaga faapena i le 400. Ia e alofagia. Ou te talitonu lava so o se mea e finau atu i lau Afioga e te fetuunai ma e silasila totoa i ai aua lou alofa i le atunuu ma e o lo o moomia le fesoasoani.

O le agaga lena i lau Afioga. Faafetai o lea ua amata le galuega o le faaleleia o le alatele e agai atu i o lea ua matau o lea ua amata tonu mai lava i luma o matou. Atonu o le a maua le avanoa e le gata i le faaleleia o le alatele, ae o le a toe fai faalelei ai ma le taligalu o le matou nuu, matou lava lea e pito i le sami. Malo faafetai i le gasologa o feau ma galuega, aemaise foi o lea itu atu i sisifo atu o le matou nuu i le taligalu, leaga ua leva ma ua amata ona goto i lalo le taligalu i le mamafa ma le maualuga o galu o le sami ma le suiga o le tau o lenei vaitaimi. E pei o le talosaga lena i lau Afioga.

Ona ou oo mai lea i le... e le o se talosaga, ae ou te talitonu o le avanoa e momoli atu ai le agaga faafetai o lenei itumalo aua le faatinoina o galuega e lau Afioga i le Minisita o le Soifua Maloloina ma le Matagaluega. Ia viia le Atua i le soifua galulue ma le ola tautua i le atunuu. E mafaufau i lenei vaitaimi i le pagatia o le lalolagi ma le taumafaiaga o le puipuiga o le tatou atunuu i le soifua maloloina ma le tele o fita ma luitau aua faamai, e le

faigofie. E le faigofie. E vaai ma le alofa i le puipuiga o Samoa aua ia faafitauli o lo o tatou feagai pea. E vaai atu e le iloa se vaitaimi, e matua maloloina ai le lalolagi ma tea ese atu nei faafitauli, a o le agaga faafetai lena i le le vaavaai masei pe silasila i se isi tulaga. Malo faafetai i lau Afioga i le Ofisa Sili o Pulega ma lau Afioga i le Minisita, malo le onosai ma le Matagaluega o le Soifua Maloloina.

Lau Afioga i le Minisita o Tupe Maua lau Afioga i le Sui Palemia, e faapena foi le agaga faafetai. Faafetai mo galuega lelei ma le tulaga o le atiaeina. Ae pau lava lea o se fesili i lau Afioga, ua maua lava i saililiga foi ma suesuega ona o lea e faapea sa i ai le tatou poloketi lea o le tatou scanner po o le... e faafesili atu i lau Afioga po o le a se tulaga ua oo i ai, o le a se tulaga, aua o lea ou te talitonu o le grant mai le ADB lea ua uma ona tuuina mai le fesoasoani mo le tatou talosaga aua le poloketi lea, ae faapena se lagona.

O le isi itu o lau mataupu i le Matagaluega lau Afioga i le Minisita, a silasila lau Afioga ma le paia o lenei Maota lau Afioga i le Fofoga Fetalai, o i tonu lava lea e ala ai ona taulaga sou leo i le mataupu lea. A tatou matau i lenei vaitaimi, o le matautia o le ofi mai o tulaga ia e le manaomia i lo tatou atunuu, o laau malosi. E leai lava se isi auala e oso mai ai mea nei, e leai lava se isi mea e ui mai ai ma sao mai i totonu o Samoa, o le tatou atunuu nei mea, ioe. O i lava i le uafu, o i lava i le uafu. E feoloolo lalo i le malae vaalele, ou te iloa o la e mautu, ae o lea foi e i ai le K9 ma tulaga faapena e fesoasoani i ai. E le gafatia e le K9 lea e pei ona saunua le sui usufono mai Aleipata Itupa i Lalo. E le tasi le galuega lea e ono faatino i le falute mai o pusa oloa ma afifi a tagata ma faamomoli. E le mafai, leaga e moomia foi e le taifau vaeatu le Maota se malologa lelei ina ia mafai ona faaaauu le galuega, maua le malosi o lea meafaigaluega. Afai e tasi lea e i le Matagaluega o Leoleo tasi lea e i tai, o le mea moni o lea ua tupu le tatou atunuu ma tulaga faapena. Ae o lau tatalo lena, e moomia, e moomia, e moomia le meafaigaluega lea e le tatou atunuu aua le puipuiga, aua le puipuiga.

O le taimi lenei, ou te talitonu o lea ua leai se tatou vaa, ua leai se Nafanua, o nisi tulaga faapena i le tatou sone aua le ogasami, ae tatou te le ma iloa. O le Pasefika lea ua fai ma route e omai ai vaa faila ma tulaga o fualau faasaina e momoli atu i le isi itu o le lalolagi. Talu ai nei sa maua foi i tala, ia na maua i le atunuu o Toga se isi vaa faila e matautia le uta aua ia tulaga. Ia, o le taimi lea ua leai ai se tatou vaa. O le faafesili lena, o faapefea ona fai le puipuiga o le tatou sone i le gataifale o le tatou sami? Sa ta mafaufau foi o lo o taumafai e kava mai e Niu Sila i le latou vaa i luga o le ea, ae ua ta le faalogo po o le a se tulaga o i ai. Ae patino tonu lava se agaga faafesili i le tulaga lea o le tatou masini i tai. E le gafatia foi e le manpower o le afaigaluega ona siaki uma oloa, e le mafai. Aua, ia a sau se pusa oloa tele, e fiu si afaigaluega e taumafai e saili mea uma ma faamaonia le tonu ma le sao o mea ia e aumai.

O le tuualalo lau Afioga i le Minisita vaeatu lau Afigoa i le Fofoga Fetalai, e tatalo atu ai i ia ona vaega, se i silasila i ai, o lea ua tatou matauina ma tatou iloa le tele o le aafiaga o le tatou atunuu. Ioe. Ua lagona le iuleo o le fefe i totonu o le tatou atunuu i mea ia. Ioe. Ua lagona, e le mafai e le tatau, ma e matua le tatau lava ona oo Samoa i se tulaga faapena. E aumai nei auupega malolosi o ai e faaaoga i ai? O ai e faaaoga i ai nei mea? O le agaga lena. O le tatou atunuu o le atunuu filemu, ae a aumai loa ma sao mai totonu mea nei, o lona uiga, ua tatou laa i se isi tulaga. E matau ma le alofa i le tatou vaitau ma le vaavaai i le lalolagi ma atunuu o lea o lo o i ai nei mea. E le maua se toafilemu, e le o maua se nofo lelei i le ao ma le po. Ioe. Ia e alofa, e tatalo atu lenei usugafono lau Afioga i le Minisita, se i silasila i ai, ia fai se laveai, fai se galuega.

Ae momoli atu le agaga faafetai i lau Afioga i le Tamaitai Ofisa Sili o Pulega ma le Matagaluega e lagolagosua i le Afioga i le Minisita, malo le galulue, faafetai le tautua atunuu.

E faapena foi se lagona i lau Afioga i le Minisita o Leoleo, o le laina lava lea e tasi, o le laina lava lea e tasi, ioe. O le puipuiga o le saogalemua o le tatou atunuu, ioe, o lea lava e le o asa la outou galuega, e le o nofonofu vale le Matagaluega o Leoleo. Lau Afioga i le Minisita ma le Matagaluega, Taitai o le Matagaluega aua Sui Komesina ma le... ia malo le mataala, malo le alofa ia Samoa. O le mea moni, e le na o upu ma tala, a o le ola faatino ma le ola galulue. O tino na o upu. Ou te tatalo atu, faaauau galuega lelei. O le puipuiga faafetai o lea ua uma atu le kerisimasi ma le tausaga fou, e ui lava ina i ai nai faafitauli laiti, ae ua tele lava le suiga, tele lava le suiga o le saogalemua. E faigofie lava. A ta sau mai o i Fasitoo, a ta sau i Apia e taofi ita e leoleo i Malua, siaki lota laisene, ae ta te oo mai i i Malie, e toe taofi foi ita ma i i Puipaa. Ona ota sau lea ma ota mafaufau, po o le a le uiga o... Ae ota alu atu i le isi aso, e siaki atu lota laisene, fai mai le tala a le malu o le Malo, "Aiono, pe ua faafitu ea ona siaki lou laisene i lenei aso." Ae ta te alu ma ota mafaufau i le taua, e ta te le musu e fai le mea lea. A o le uiga lena o se faamatalaga, o le matua oooo o le faatinoga o galuega ma feau, ioe, leaga o le taimi lenei ua maaleale le lalolagi.

O lea e momoli atu ai le agaga faafetai i le Afioga i le Sui Komesina ma le Matagaluega, lau Afioga i le Minisita, malo le galulue. E le o asa foi se tou osofaiga ma le aliali mai ma le maua o nisi tulaga o laau faasaina ma laau malolosi o i totonu o le tatou atunuu. O le mea moni, e sola lava le amioleaga ae tuliloaina, ae fiu foi e lafi e maua lava, ae faamoemoe i le galuega aua le paia o le Matagaluega, ina ia maua le toafilemu ma le nofo lelei o si o tatou atunuu.

Ona oo mai lea i le tulaga o le tatou Tala o le tatou Tupe. Faafetai atu i lau Afioga i le Minisita o Tupe, malo le tapena, faafetai le faapalepale foi ma le tapenaga e le faigofie. O lea ua matau atu sa ou susesue ma tau saili le Tala o le Tupe Autu, o lea ua matau atu o lea ua oo lau faasoa... Tailo ia, taatia isi

Matagaluega a o le Matagaluega o le Pulega o le Suavai ma le Eletise, faafetai o lea ua o o i ai le faaso. O le operation o Pulega ia e le o ni tamai galuega, ae faafetai o lea ou te iloa e uma lava le \$2 miliona lea i le EPC i pili o street lights, e le taitai ona lava. A o le faamatalaga, ia e ui lava foi pei sa maitau pei sa aveese nisi ma faaitiitia tupe ia, a o lea ua toe faafoi i ai le tai \$2 miliona ia i le Suavai ma le EPC. E ui lava ina lava, ae o le mea sili ua i ai sina togi se tasi. Ia, viia le Atua i le faaso. Atonu i alumaga o lenei tausaga ua siisii atu i luga le tatou tamaoaiga, ona faapena lea ona aapa i ai lou aao i lau tufa aua vaega ia o le tatou... O Pulega ia o le Suavai ma le Eletise, ia, o lena e silafia, o le matua moomia lava o vaega ia, aemaise le tatou atunuu i le lautelega. Tatou te le iloa atu nisi o tatou aiga, ae faafetai o lea... Ia talosia ia i le alofa o le Atua e faapena foi ona avatu se lagolago i lau tapenaga aua le Tala o le Tupe. Malo faafetai, e lagolagoina foi.

O le tulaga o la e faafofoga mai lo matou itumalo lau Afioga i le Fofoga Fetalai, ia e ao lava ona o oi ai sou leo, leaga o lea ua taoto saunoaga ma finagalo o le Malo e tusa ma ia mea, o la e tapuai mai lo matou itumalo i tai \$1 miliona lea sa faapea i tausaga taitasi. Ua ou talia, ua ou talia lau Afioga. Le paia o le Kapeneta ma lau Afioga i le Palemia, ua talia e lenei itumalo, leaga o lea ua amata le Tala o le Tupe Faaopopo, a o lea ua uma... ae leaga o lea ou te lee iloa pe toe afea le isi \$1 miliona aua e \$1 miliona lava i le tausaga. Ae ne i te i ua uma ae le lava le faaso ona misi lea o le \$1 miliona muamua, ae aumai e ave e faaso se i fai ai matou atinae. O upu tuusasa, o talosaga e momoli atu i lau Afioga i le Fofoga Fetalai, o la e faafofoga mai le paia o le Malo.

O le isi tulaga lau Afioga, ia, sa ou manatu lava pe avatu, leaga o le mataupu lea o se mataupu ogaoga. O lou tagata ma lou aiga na matua... lea lava e oo mai i le taimi nei lau Afioga i le Fofoga Fetalai, o ou aiga i fafo ua le iloa le tulaga e i ai, ua amata ona va le fogavaa. Ioe. O le faamatalaga lea e momoli atu, e faamalulu atu, e moni ua tea ia taimi, a o le agaga, leaga e le mafai ua oia le matou va nonofo i le lotoifale faaleaiga. Ioe. O lea lava... o le toatele o lou aiga i o e lagolago uma lava i le Malo. Ioe. O le tulei la e tulei mai ai latou faamatalaga ia te au, o le a e saga nofo lava i ina o lena o le a faatau e Saina le tatou aiga? Ioe. O fea a outou o i ai? A faapefea o la o le a Faatau uma e Saina le tatou atunuu, eleele ma fanua? E lagona le faanoanoa lau Afioga i le Fofoga Fetalai, lagona le faanoanoa lau Afioga i le Fofoga Fetalai. O nisi tulaga, o le a le mea ua sisi ai le fua a Saina i totonu o le Maota Fono o Samoa? Se i vaai i ia mea? Ou te le iloa pe faapefea ona ave ia faamatalaga. Ae o ou aiga, e tautua mai ma fesoasoani mai i le aiga, a o le afaina lena o ia mea, o le naunau i le ufi ae leai se fefe i le papa, ae oia ai le va nonofo o aiga.

Faafetai o lea ua saunoa le Afioga i le Tamaitai Palemia, e leai ma se mea faapea o tupu, e leai ma se mea faapea o tupu, o lea lava e mautu, lelei fanua faale-atunuu ma eleele o Samoa. E leai foi se mea o faaletonu i le taitaiga a

le Malo talu ai. O le uiga lena o sau tala lau Afioga, tatou te agai i luma, e tasi lava le tulimatai, o Samoa ia manuia. O fea lava le itu, e faapena ona tatou galulue mai ai. Ioe. Ae ua faatea ia mea, a o lo o taumafai pea ona talanoa, leaga o nisi o lou aiga o faifeau, ioe, o lea lava e maoti ma malamalama lelei i ai i ia tulaga, a o le agaga lena. O le aafiaga lena e pei ona ou talanoa atu lau Afioga i le Fofoga Fetalai. Ia, na ona ou faaleo faapena, ae taumafai lava e tatalo i le Atua ina ia aumai le filemu ma faafoi le aiga i le mea na sau ai.

Lau Afioga i le Fofoga Fetalai, ia ou te talitonu o le a agai atu foi se leo o lenei itumalo i le tulaga o le tulai ma le lauga foi faataupou, malo faafetai. E momoli atu le faafetai i lau Afioga i le Taitai o le Malo lau Afioga i le Tamaitai Palemia, malo mo le galuega ma le taitaiga o le tatou atunuu. O le tatalo lava ia, ia faamanuia le Atua ma maua lou soifua laulelei, faamoemoe i le Atua le galuega ma le taitaiga o Samoa aua se lumanai manuia o tatou tagata. E faapena foi i lau Afioga i le Sui Palemia, le saofaiga a lo outou vasega o Minisita, alii ma tamaitai o le Kapeneta, ia utupupuina la outou tofa, maua so outou finagalo e tautua ai le Atua e ala i tiute ma faiva, a o le alofa vaaia lena aua Samoa ma le tatou atunuu. A outou afioga i Minisita Lagolago, o outou e vae ma lima i ai le lagolagosua i le paia o le Kapeneta. E faapea foi lenei itu ma lenei talaga, le afioga i le Taitai, e ui ina e le o lava lona soifua, ae talosia e le Atua ia faaatoatoa e le Atua le gasegase o lo o feagai ai ma ia. Ia maua foi le malosia e lau afioga i le Sui Taitai, ma sui usufono o lenei Vaega Faaupufai. Ia tatou tau fai galulue, galulue aua lo tatou atunuu.

E le itiiti le agaga faafetai i le paia o lenei talaga o le Malu, la outou saofaiga i le paia o Ofisa Sili o Pulega o Matagaluega aemaise o Ofisa sili o Faalapotopotoga, se malo le toa, faafetai le galulue, faafetai le tautua atunuu. O outou e tua atu i ai le Palemia ma le Kapeneta lea. O a outou fautuaga ma la outou tuualalo, e manuia ai faiva ma feau ma galuega a lo tatou malo. Ia onosai, e i ai faaaitaui ae faamoemoe i le Atua e fesoasoani mai.

Lau Afioga i le Fofoga Fetalai, ia lele malie lau tia, i le taitaiga o le Fono a le atunuu. Ia to mai lagi manuia o le Atua aua lou feagai ai ma le galuega e le faigofie. Ia maua lou malosia, manuia lau afioga ma le faletua ma le aiga.

Le paia foi o le tatou Maota aua le Ofisa o le Fono, lau afioga i le Failautusi, viia le Atua i lou tulai mai. Au o manu lou alofaiva. Le Sui Failautusi ma le paia o le aufaigaluega, ia faamanuia le Atua.

Ia faamanuia foi le Atua, e le galo si ou aiga, i le tapuai mai a si ou tina la e matamata mai. Ia maua lou malosia, aua lau tapuaiga. O si ou toalua ma le fanau, viia le Atua i le ola valaauina. E tele tiute ma tofi, e o lava ma le loto mauualalo, ia faamoemoe i le Atua.

E le galo foi nai ou aiga e le gata i Samoa nei, a o la e faafofoga ma maimoa mai i atunuu mamao. Malo le tapuai, faafetai tatalo, faafetai foi fesoasoani mai. O a foi nisi tulaga e pei ona outou faafofoga mai i lau talanoa. O lea ua

uma atu, ae alo i luma la tatou faigamalaga i lenei tausaga. Ia auomanu i le alofa ma le agalelei o le Atua.

Ia foi mai se matou tala lau afioga, foi i fanua so matou leo aua lo matou tulai atu, se sao foi o lenei matou itumalo ma lenei usugafono, aua le Tala Faatatau Faaopoopo o le Tupe ua i ai nei la tatou galuega. Soifua ma ia manuia le Maota.

Na faaalua le agaga fiafia o le Maota i le patipati o latou aao i le maea ai o le saunoaga a le sui usufono mo Aana Alofi 2.

FOFOGA FETALAI: Ua faamalo malele faafetai tofa i lau Afioga i le sui usufono mamalu mai Aana Alofi 2, lau afioga Aiono.

Ua matauina lava ma le totoa e le Nofoa le saunoaga aemaise foi o le tofa faatoeaina, e pei lava ona fai atu, o oe o se tasi o sui usufono matua, ua leva foi ona e i totonu o le Maota. O lea foi ua e sausaunoa, o lea lava e te saunoa faatama, faufautua i le Faigamalo aua le agai i luma. O le mea lea, malo faafetai, faafetai mo lou sao. O lea foi ua faafogafoga ma le totoa le Afioga i le Palemia le Kapeneta ma le Faigamalo, o lea lava ua aumai faafautuaga faatoeaina, faatama aua le agai i luma o le atunuu aemaise foi o le itumalo, aemaise foi o le saogalemu o le atunuu e pei ona maua i le saunoaga.

O tulaga foi i si ou aiga, tatou tau fai tatalo, o tulaga lava faapena o nai o tatou aiga, tatou tau fai tatalo ia maua pea le filemu o le Atua ia ma tatou agai pea i luma ina ia manuia le folauga aua le taitaiga o le atunuu, e le Faigamalo foi a le tamaitai Palemia mo lenei vaitaimi. Ia tatou faamoemoe pea i le Atua, faafetai lagolago mo mea uma. O le mea lea, malo saunoa faafetai.

O le taimi lenei o se tasi o sui usufono mamalu mo le Tala Faaopoopo o le Tupe. O lea ua matau atu e pei o le toe sui usufono lea o i latou o e ua autovaa mai i le Maota, vagana se tasi foi o sui usufono o lo o toesea mo atunuu i fafo.

O se tasi foi o sui usufono ua leva ona fofou mai i le Maota, sui usufono mamalu mai Sagaga Nu 2. E talitonu foi o le a e afio mai i le Maota ma e saunoa mai i se mea e manuia ai lo tatou Maota.

O lou avanoa lea i le taimi lenei, lau Susuga Maulolo Tavita Amosa. O lea ua ou taua lou suafa e amatalia ai lau folasaga i lenei taeao. Manuia lau lauga.

SAUNOAGA FAA-TAUPOU

Susuga MAULOLO TAVITA AMOSA (Sagaga 2): Ua avefa la lou taua o lou igoa ua atili ai ona ou lili'a.

Atonu o se lagona i lenei ituaso e tomanatu ai i se tasi o vavau i le afioaga o le tamaitai Palemia. Se ua ta lilia i le to sua ma le to le sua. A o ai se a le

ee i liaga, ua suefuefue le tai, ua oootutu le paia maualuga o sui filifilia mai lo tatou atunuu. O lea ua amata ona tatou umufonotalatala i le amataga o lenei tausaga. Ua tatou mimusa ma alealeaitu ae faatalitali ma faanonomanu i le Atua o Malo e faatonutonufolau mai i la tatou folauga. Ua maea ona e sula le alofa o le Atua lau Afioga i le Fofoga Fetalai. Ua maea foi ona e faooloolomaau ia to mai lagi manu, aua le Fonousu a Samoa i lenei taeao, fai lena ma taua.

Ae ou te soso atu ma faatulou atu, faatalofa atu i le paia o le Maota nei. I le afio o lau Afioga i le Fofoga Fetalai, afifio sui usufono mamalu o itumalo taitasi o Samoa.

Afio lau Afioga i le Tamaitai Palemia ma lau Kapeneta. Afio le Afioga i le tapuaiga i le Faamasino Sili, le Afioga i le Peresetene ma le saofaiga mamalu i alii ma tamaitai Faamasino. O le paia maualuga lava lea aua le Tafatolu o Saofaiga Fefaatauagai o lo o latou lufilufia le tofa ma le utaga e manuia ai le Malo o Samoa.

A o upu a le atunuu, e le sili foi le ta'i i le tapuai, ona manatua lea o le tapuaiga a lau Afioga i Le Ao Mamalu o le Malo, le Afioga ia Tuimalealiifano ma le Masiofo. A o se tapuaiga foi i lau Afioga i le Sui o le Fono o Sui Tofia, lau Afioga Le Mamea Tuiletufuga Ropati.

O le tapuaiga maualuga lava i le aufaitatalo le au Sa Levi i so o se fatafaitaulaga o lo o latou faanonomanu aua le tofa liuliu i le Maota lenei.

Ona ou see mai lea i paia ma mamalu o Samoa na filifilia o tatou tagata, i lena paia ma lenei Itu. O paia aua Tulaniu o Atua, Ao o Atua, Uso o Atua ma Iu o Atua, ae a Atua le Faiga. E faamemelo outou paia aua le papa i le afio o le Tama a Aiga le Tuiatua, ae matua le tuu faafaleupolu ia te oe Lufilufi o le Tumua. O lau faautautaga o lo o leo ai Laloga fuafua vaeane le mamalu o tootoo o Laloga fuafua ma ona tua.

E faatalofa atu foi i le paia o le Vaa o Fonoti, i le afio o Ulualofaiga, Sa Fenunuivao ma Salevalasi o fetu pupula o aiga tau tupu o Samoa. A o se faafaleupolu foi, Aumua ma Oloatua lo outou toafa ma le matua ia Talamaivao, o paia aua le afio o le Gafa, ae a le afio o Alosina, le paia o Tapaau tausi e le Ailaoa aemaise le faautautaga ia te oe Too o le Fua. O le too a le tama o le saesaegalaufai a Tumua ma Atua.

Le paia o le itumalo i Aana, le afio o paia aua le Tauaana, Satuala, le Taulagi ma le Aiga o Mavaega, aiga e fa o lo o tausi vaatele e tootoo, Mauga ma Nuuausala. Lau faautautaga ia te oe le fetalai i le Tumua, e matua ia te oe le faautautaga i Aana, Le Matuanatogi ma le mamalu o le Faleiva.

Ona ou see mai lea i le matou Faletuamasaga nei. Ee le paia maualuga ia te oe le Nofolii o le Malietoa, a o le Itutolu o Sagaga, talofa Sagaga i Palalaua, Sagaga le Vaimauga ma Sagaga i le Falefa, o oe lava o le Sagaga o le Ailaoa. Lo outou Itutolu lea o lo outou Faletuamasaga.

A o le paia maualuga Tuna ma lou ituau malosi. Afifio Tapaau tausi e lo outou toafa, Une ma Manuleleua. Le toaina matua o Ale lea le fetalaiga ia Ulu ma le mamalu ia te oe Faleata.

Ona ou pai atu lea i le la tafa o le Faletuamasaga i le Aiga Malosi. Fata ma lou Alataua o tofiga. Le paia aua Satunumafono o le Falefa o Ulugatanifa, le mamalu o le Faletolu, Taulauniu ma Áitutagata, faapea se faautautaga tatau ia te oe o le Alataua.

Ona ou see atu lea i si o matou motu i Salafai. Leilua ma ou alo, Sa Alalatoa ma Sa Malietoa, o paia ia o gafa tau Tupu e polapui i lo oulua fala seelua, Tuilagi ma Namulauulu, o oe o le Pule i le mamalu o tootoo ma ona tua o Fuifatu, malo le soifua!

Saleaula ma lau faatufugaga, aua o oe o le Tautaiolefue, ma Tauiliili lo oulua fala seelua i alii e lua Maopu ma Sa Peseta, a o se faautautaga ia te oe, tou te mimita lava ma fai mai o outou o Tufuga Pule, o le Tufuga Toatamai, ae faafetai e lotolotoi ai ma oe le Tufuga Alofa Saleaula ma lau faatufugaga.

O paia foi e polapui i le malae i Finao, i le afifio o Sao e Fa ma Sa Umalau, le Atipouniu ma le Faasau, le fetalaiga ia te oe le alii o le itu, Lavea aemaise tootoo o Finao e faigata o oe le isi Pule e lauiloa foi i le talafaasolopito i Salafai.

Siuasave seia paia Mati'a ma Mati'a Ituau, le afifio o paia maualuga aua Aiga Samoeleoi, Lilomaiava ma Mavaega, se fetalaiga a le faautautaga a Salafai ma tootooau o Vaisigano, faamalo le soifua!

E faatalofa atu foi i le itumalo malosi ia Satupaitea ma le Itu Salega. Lauiloa le paia ia te oe le Vaaiti ma le Vaaimalae, Tapaau ma Samoeleoi e tausi vaatele, i le nofo a ituaiga i le Alataua. Ae manatu foi, i tupu o le itu ma alii o le itu, le nofo a ituaiga a le Alataua ma le fetalaiga ia Tuisalega. E le o mamalu ea ia e afua mai i Tapapa ma Matailiili seia paia Faletoi e alaala ai oe le Matua?

Palauli ma lou Itu, le paia aua le afifio o Faasisina, a o gafa tau le Niusina aua oe le Lilomaiava ma Aloalii. Sa Faleletaua na potopoto, o le mamalu lea o Palauli ma lou itu e afua mai i Muaava ma Teevao seia paia Vailoa. Ua faamalo i le tapuaiga i lo tatou motu tele i Salafai.

E le o galo ia te au oe Aiga i le Tai. E faigata paia o lo outou Toafa o Alii. Le mamalu o le toalua o tulafale ma le Fale Manono. A o paia foi aua Sau ma lo outou aiga ae a le faautautaga ia Sauma ma le nofo a faleupolu. O le paia aua Sa Malietoa, o paia tausi ia a aiga e faamemelo i ai le lauga a Ati ma Lautolo. O paia ia aua le Aiga i le Tai.

Ona ou see atu lea i le tapuaiga i Sasae, le afio o le Kovana ma lau Faigamalo i Maota e lua. O lo o outou lufilufia upu faa-Malo aua se manuia o Sua ma le Vaifanua, Fofu ma Aitulagi, Ituau ma Alataua, Saole ma Saleaamua ma le Launiu na Saelua. A o le paia foi i le afifio o Faatui, Tama a le Manuatele le mamalu i le faautautaga ia te oe ma le Faletolu, aua Tootoo o le Faleula Tauaitu ma Faleula Tautagata. O paia ia o Samoa e afua mai i

Sasae i le oneone le ufitia i le malae o Pomasame na afua mai a le Laulauivasa ma le Lautaaamutafea a le Malietoa seia paia Fili ma Puletuu, Fuiono o le tama na fai mai na te tuvaoga le fono, pe a feiloai le afioaga, ae tainane foi malae o Faatoatoa i le Alataua i Sisifo.

O paia ia Samoa o lea tatou te sapi ai nei, ma tatou maua ai le mitamitaga o suli ma feoi. E leai ni tagata noa i Samoa, ua na o tupu ma ee, lea ua afifio ma papaaao i le Tupua ma le Malae nei.

O sina upu lava e agai i lo matou itumalo. I te i ua ou alualu i faalupega o le atunuu, ae le palota mai ia te au i le isi tausaga.

Sagaga 2, o oe o le Sagaga le Usoga. Le afio o Maualaivao ma lo outou Aiga Sa Maualaivao. O le paia foi aua le afio o oe le matua, Faamausili, susu Seiuli ma le Foalii. O paia ia o tapaau tausaga e lau faautautaga Auimatagi ma Pou e fitu o le Fale Malietoa, malo le soifua!

A o paia foi i le afioaga i Tuanai. I le afio o Saena ma lo outou aiga Sa Saena, le alo o Fuatino ia Luafatasaga, o paia aua Tuitea, Utu ma le Faavaoga. O paia ia ma mamalu e faamemelo i ai lau faautautaga Fale ma Le Afu o le Alataua, ma lau fetalaiga Tupai.

E amuli sau faamatalaga, e faatalofa atu ai i si o matou nuu o Afegaalofa. Afio le paia i le Aiga Sa Gauifaleai, lo oulua fala seelua, alalatama Savea ma Ututaaloga, ae a le matua ia Manuaifua. Afio paia i Usoalii Maposua La'a, afio foi Leuluaialii ma le Faavaoga, o se paia maualuga aua alo o tofiga alii i lau afioga Pualau. O paia ia ma mamalu i aiga e puipui ma tausaga e faautautaga a Fata ma Maulolo, o le susuga lava lea ia Tuisamau ma le tama na autaele ai le Alataua.

E avatu sau faamalo faapitoa i lo tatou itumalo. Ua maea la tatou filiga, faafetai mo le faatuatuaga ua aumai. A o i ai nisi lagona tatou faasola ia, sola atu lena tausaga, fotuai mai lena tausaga fou, o lea ua tatou laulua fesilafai i le Maota nei i le masina o Utuvamua i le faitauga o le kalena faa-Samoa. E faafetai mo le faatuatuaga aemaise lou aiga. Lau afioga i le Alalatama ia Ututaaloga ma le aiga i Afega aemaise o komiti foi mai nuu taitasi. Faafetai ua to se matupalapala, o la outou ula lea ua outou aumaia ia te au. Ia alo ane ia, e fai le faiva o tapuaiga, tuumumusu mai se tofa ma sa outou faautaga e fesoasoani se i faufau ai se vaivai o la outou sui usufono, aua se sao o le ta itumalo i upufai o le Malo o Samoa.

E faapitoaugafa sau faafetai i lau Susuga Seiuli Ueligitone, o le sa e tu mai i le foe o le tatou itumalo, i lena Paeaiga ua tuanai.

E fono faapipii atu i ai ma sau faafetai i tamalii foi o le itumalo sa tatou taufetuli i le taufetuliga muamua ma le taufetuliga lona lua. E leai lava se isi o tatou e le i sela ma vaivai. Ae ui i lea, faafetai i le alofa o le Atua, o lea lava e maua lo tatou malosia e feagai ai ma o tatou tiute ma galuega.

Lau Afioaga i le Fofoga Fetalaia, e tamalamala lava se upu faafaiva alofilima o le Aiga Salevaiolo. Aua e fou foi i le Maota, e faaeteete foi ne i mea ua sipa le lamaga. A o le taiga na aumai, aua ne i afea ni mea taitasi o le Tala o

le Tupe, ae tautala faalauaitete. A o le mea foi e lelei ai, ia, aumai lava se avanoa se i o matou fana le u i le vateatea e avatu ai se tuualalo.

O le manatu autu, e tau limataitaina ai se vaivai tuumumusu atu a lenei itumalo e ala i lou sui usufono, ua feagai nei Samoa ma le lalolagi ma luitau ogaoga ua aafia ai le tamaoiga ona o le soifua maloloina, ia faatasi ai ma suiga o le tau. I lou lava vaivai, o se fatuaiga tausii lea a lou sui usufono ma le Maota lenei. Se i silasila totoa i tulaga e mafai ai ona tatou feagai ma luitau ia, e faamalumu mai ua aafia ai le tamaoiga.

O le Matagaluega o Aoga, ua ou fiafia lava i lou faalogo mai i tofiga, ua maua e se tasi foi o Matuaofaiva o le Matagaluega o Aoga, le tofiga faa-Minisita. E le o toe po se lilo i le silafia, o le fatuaiga tausii a so o se Matagaluega o Aoga i se atunuu, o le fai lea o aoga ina ia talafeagai ma tulaga o i ai lena atunuu, ina ia siitia lona soifuaga, tulaga soifua laulelei. O le fesili lena ua ou tuufesili ai nei lou vaivai.

Se i o tatou tagai ane i le Kolisi o Sagaga. O le kolisi lenei o Sagaga e i totonu o lo matou itumalo o Sagaga 2, aepeitai mo le silafia e le mamalu o le Maota nei. O Sagaga 1, Sagaga 2, Sagaga 3, Sagaga 4, e 4 lelei itumalo faapalota o lea e aafia i le kolisi lenei. Ina ua iloilo atu ia suega a tamaiti o le Kolisi o Sagaga i le 5 tausaga talu ai, na i ai se mea na aliali mai ai. O le agai atu i le Tausaga 9, Tausaga 10 agai i le Tausaga 11, pe tusa ma le 80% i le 85% o tamaiti, ua muta i ina le latou aoga. A toe iloilo atu ia taunuuga o suega a le fanau pe a maea le Tausaga 12 ma le Tausaga 13 sa i ai, e na o se 1 pe o le le atoa o le pasene e mafai ona faaauau a latou aoga i le tertiary Level, e i ai le Iunivesite, Polytechnic ma tulaga faapena.

O le fesili e fesili ai, o fea o agai i ai le isi 90%. O le fesili e fesili ai le matua, ua uma nei mau tausaga o ave lau tamaitiiti i le aoga, ua foi mai pe a uma le Year 10 ua le mafai ona faaauau le aoga. E sau na o si ana fasi nanu, sina tamai Matematika se i tulou, sina iloa laititi faasaienisi. E i ai se agavaa e mafai ai ona galue ma fesoasoani e atiae le tamaoiga o le aiga? E leai. O le fesili lena o lea ua tuufesili ifo ai, lou nei sui usufono. O talafegai ea le tulaga o i ai mataupu o aoga i totonu o le Kolisi o Sagaga, ma le malosi o tamaiti?

Ua tatou silafia ma iloa uma le tala i taleni. E eseese uma taleni na aumai e le Atua, e eseese uma mea tatou te agavaa ai. E fai foi o lena, ae fai mai faamaumauga a le Matagaluega o Faamaumauga o Fuainumera, le SBS. I le tusigaigoa o le 2016, o lo o faamauina ai e 51% o le tupulaga talavaou e unemployed, e leai ni galuega. A lea la e vaavaai i aoga, e le o le vaega tele lena o lea e drop out mai se i tulou, o le upu e to ia te au. O lea la ua tulai mai faafitauli, i le tamaoiga o Samoa, e le o se ituaso ma le vaitau lenei e ao ai ona liuliu le tofa i le Maota lenei. Se i toe fesili ane i lau afioga i le Minisita o Aoga, po o sagatonu le la o folauga po o talafeagai. E faafetai o lea ua maua atu, ua amata ona outou faatino nisi o polokalame ua leva ona faataatia, le mea lea tau Technical Vocational Education and Training po o

le TVET. O aoga faakamuta, faapalama, fai uila, kuka ma mea faapena. E leai lava ma se isi ia matafaioi ma ia agavaa e le maua se galuega e mafai ona fesoasoani i le aiga. Tuu pea le au malolosi i tulaga tau academic, o pea i luga. Ona fai foi lea o le fesili, latou la ia ua o ese mai le tau Tausaga 10. E le mafai ona o i Don Bosco, e le mafai ona o i le Laumua o Punaoa. O le a se tatou faiga e fai ai? O i ina la lea ou te soso atu ai, e le o le matafaioi lena e fitoitonu lava ma le vaega lea o le Samoa Qualification Authority? Lea e i ai le polokalame lea ua maea tapena o le PSET Post Schooling, tulaga o aoaoga faaauau. O lea la e faapuupuu atu ai se taofi i le matou lava itumalo, e matou te manaomia le fau o se TVET Centre i lo matou itumalo lenai. O e na le uma a latou aoga, ua o fai le toalua fai le fanau, tago atu e faigata le olaga. Ua lelei le o e palama, lelei le o e lei piliki ma mea faapena, ae moomia sina fasipepa aloaia, a formal qualification, lea la e aoga ai le PSET, le TVET lea e sau i lalo o tulaga o aoaoga faaauau.

E tatalo atu ai lau Afioga i le Minisita o Aoga, lagolago mai, o le isi lena talosaga muamua a le matou Matagaluega ina ia fesoasoani mai, faatino muamua aua e le i faatinoina a lea mea o le TVET i lalo o le PSET i totonu o se itumalo. Ae aumai e manaia foi le faataitai ia matou, a i ai ni faaletonu ia taofi loa, ae a lelei, ia faasoa atu i isi itumalo.

O le isi mea na ou vaai ua ou fiafia ai i le anavatau le manifesto a le Malo, o le tulaga i le aganuu. O le upu moni lava, atonu e te ioeina sou vaivai, o le aganuu o le malosiaga lea e ala ona tumau ai pea le maualuga o tupe faamomoli mai fafo, remittance, o le tatou aganuu. O lea la ua ou faalogologo atu i nisi o sui usufono i le tulaga foi lea ua atugalua ma popoe le taofi i le faaaogaina o le social media, aemaise lava mea nei o le facebook. Peitai, e ese sou lagona. O lea auaunaga, o se auaunaga aoga, ae taumafai tatou Taitai o le Malo e mimilo ma faaaoga i se tulaga positive. Le culture la lea e aumai e la outou anavatu pe a tusa ai ma se finagalo o lau Afioga i le Minisita o Aoga, o le a le mea e le tuu ane ai loa se vaega faapena, tatou faaaoga le facebook ma le social media e uunaia ai polokalame faaleaganuu, tapue mai ata o le sui usufono mai o i Falealupo ma latou talatuu o le vavau ma le anoanoai o upu e maua ai. O la e galala le mamalu o le atunuu o lo o aitaumalele mai. Ae tasi lea fesoasoani e mafai ona fai e le Matagaluega o Aoga, tatou faaaoga i ai le facebook ma le social media ina ia ave ave ma oo ifo i loto ma agaga o tagata Samoa, leai la, o le facebook o se nofoaga tatou te sue faalumaga i ai aua measina a le atunuu, ma faapena ai lava ona liuliu malie lagona o le atunuu i le faaaogaina o lea foi auaunaga aoga.

Toe foi mai tasi lava lau tautalaga i le TVET. O le mea lea e tulai mai i au sutesuega, e moomia lau Afioga i le Minisita o Aoga ma le Malo ona tauanauina service providers o latou lea le APTC i le Papaigalagala, Don Bosco, le Laumua o Punaoa, latou ia i fale inisinia, tauanau ina ia aumai le latou polokalame lena i totonu o afioaga. Lea la ua matua talafeauga ma le tulaga lea ua agai i ai le tofa i ina i tupe ia o le a tufa mai tua, o se vaega

tatau lea o le a ogatasi ai le futia ma le umele ma se fuafuaga a lenei itumalo. Ua 2 fono na fai i le SQA, o le latou pese lava lea e sasa ai le private sector ma latou ia service providers i mea faapea, ina ia aumai, ia ae pei e faafaigata ona o ese ma potu aoga, o la e faafofoga mai. Ae atonu a alu atu se tuumumusu i luga i le tulaga i le Palemene ma le Malo, atonu o i ina o le a amanaia ai, tatou o lava, afai lava o lea ua finagalo la outou faigamalo ma le tatou faigamalo i lenei vaitau se i na ave mea ia i tua i le atunuu, se a la le mea e le tuu atu ai ma le TVET Centre a Sagaga 2? Matou amatamea, a manaia, faaoga atu e isi ma avatu le talalelei i isi itumalo.

Ona ou see mai lea i le tulaga o le Soifua Maloloina. Ae tasi lava si mea sia e faamanatu atu lau Afioga i le Minisita o Aoga, aua foi ne i tetena i lou finagalo. Toe silasila ane lava i le tulaga o lo o outou faatino ai suega faaii, le National Exam i le tausaga 8. Ua tuufesili e lou nei vaivai le ave o se National Exam ae multiple choice uma fesili. A faapefea ona sue reading and writing skills o le tamaitiiti aoga? Ia na ona tuu atu i ou tafatafa se i toe liuliu malie i ai le tofa.

O le Matagaluega o le Soifua Maloloina, tasi lea Matagaluega ou te manatu e ao ona ave i ai le faamamafa. Ua ou fiafia lava i lou faalogo mai i le leitio sa malosi foi i ai le faamamafa o le saunoaga faamanuia i le tausaga fou a lau Afioga i le Tamaitai Palemia. Ua faateia ina ua ou faitau atu i le latou lipoti lea, o le Samoa Health Workforce Development Plan. O le mea ua 2020/2021 tulai mai ma e ao ina avatu mo le silafia e lau Afioga i le Minisita o le Soifua Maloloina. Fai mai le latou lipoti lea, o le ratio, po o le tufaafegagai o tagata faigaluega a le Matagaluega o le Soifua Maloloina i falemai i Upolu nei, e tusa lea ma le 8.3, ia po o le 8 tagata faigaluega e nafa ma le vaaia o le 1,000 tagata. O lona uiga e tasi le tagata faigaluega o le falemai na te vaaia le 120. Tuu atu la i Savaii, talofa e i le motu i Salafai, o le ratio lea e tuu mai i i, e tusa e 3 tagata a le falemai e nafa ma le vaaia o le 1,000 tagata po o le 1 le tagata faigaluega a le falemai na te vaaia le 300+. Ae a faapefea ae oo mai le koviti? E gafatia e le aufaigaluega a le falemai o i ai nei lea tulaga? Ia, na ona tuu atu i tafatafa o lau Afioga i le Minisita o le Soifua Maloloina.

O le ala foi lea o le tatalo atu o lenei itumalo a o matou faatalitali i se avanoa e matala ai le to'a, e laitiiti lava si to'a la e i ai i le fanua pe 4 eka ua uma ona faamautuina mo le falemai o le matou itumalo. Manatua foi sa i ai le falemai muamua? A o matou faatalitali mo lea tulaga, ae a pe a aumai loa la outou polokalame lea na e faaigoaina o le PEN faa-Samoa? O lea ua ou vaavaai atu ua 22 itumalo ua maea ona ave i ai. Malo le galulue. Ua maua foi i lau suesuega atu i le Matagaluega, fai mai na timuia laina lau Afioga i le Minisita o le Soifua Maloloina i le molimauina o le polokalame lea o le PEN. O le mea e lelei ai, ona o la ua tuu i ai le Matagaluega o le Soifua Maloloina le vaega o tapenaga mo le koviti. E ala la ona naunau atu, e alofa se i na vave aumaia, leaga o le tulaga lea e i ai Sagaga 2, e tu i le ogatotonu o le sau i Apia e alu i Faleolo. E leai lava se isi mea, o lea ua 100 tagata ia

na ave nei e tau apu lele fai mai ua maua i le faamai. A foi mai nei, e pasi uma mai lava i luma o le matou itumalo. E vave ona pisia matou, tumu ane le falemai i Leulumoega, tumu foi Apia i le taulaga nei. Ae faamolemole, vave aumai la le polokalame lea se i o matou tapena ai. Afai ae ave ave ae tulai mai se tulaga e moomia se mea e fai se isolation, e faigofie lava i lo matou itumalo ua i ai le ofisa o leoleo aua securities. Ua i ai fale e siosiomia e pa piliki e 8 piliki e faigata ona ae ai se isi e fia sola ese. Ua i ai ma le maketi e sapalaia taumafa ma mea faapena, ma le vaega o le faletupe la ua i ai. Toe pau lava le mea lea e fia maua e matou, o se tomai ma se agavaa e aoao ai nisi o matou tagata i le itupa o tamaitai latou te faatinoina le PEN faa-Samoa. Ia o le mea sili o lena ua ou vaai atu o lena ua uma le itumalo o lau Afioga i le... ia aumaia laia o lena polokalame iinei i si o tatou itumalo o Sagaga 2.

Ona ou oo mai lea i le Matagaluega o Faatoaga. E le o toe po se lilo i le silafia lau Afioga i le Minisita o Faatoaga, i le taua o lau Matagaluega, leaga o le isi lea vaega sa faamoemoe i ai a tatou tupe maua. I le taimi na sioki ai le araisa, ma e faatupulaia pea lea tulaga ona o le mea a le pandemic lea ua aofia uma ai le lalolagi, e muamua lava ave e le aufai araisa araisa i vaega matutua ma atunuu tamaoaiga. A i ai se mea e totoe i le faasoa a le aufai araisa, ia ona faatoa oo mai lea o se araisa i inei i Samoa nei. Ae o le tulaga lea e avatu ai se tuualalo a o tatou talanoa e faasoa le tamaoaiga i le tupe. Tasi lea Matagaluega e manatu le sui usufono o lenei itumalo, e ave i ai se faamamafa. E le aoaia e Laupua Tamafaiga, ae pei e manaia foi ae uunaia ni polokalame ma silasila i tulaga foi ia o mea o faatoaga, climate resilient crops, pei o le ufi, umala, ma mea faapena e anagata pe a oo mai matagi, aua e tasi lava fola uma le togafai, alu i lalo le toga taamu. Ae pei o nai faaeleeleaga na e sao mai ai i le tulaga o le fesuiaiga o le tau ua i ai nei.

E tatalo atu faamolemole lau Afioga i le Minisita, matou te moomia se masini faamalu eleele. E tasi lenei itumalo e fiafia e galue i le mea lenei o fualaau aina. E tele ina le lava le supply o le maketi a lo matou itumalo. Sa i ai mea ia o masini sa masani ona hire mai Nuu. Ia e 3 i le 4 vaiaso faatoa maua se avanoa, a o le isi taimi e alu atu fai mai ua gau le masini. Ae faamolemole, ae afai lava e vave aumai le matou share o le \$1 miliona+, ia, atonu e mafai foi ona faaaoga i le tulaga lea, e ese le taua.

O le a ou le tautala i le tulaga lea ua fai, ua ou fiafia lava ua ou vaai atu i le Tala o le Tupe lea i mea taitasi ae leaga o lea e tapu, ae faafetai o lea ua ae se tofa i mea ia e fafaga ai lafumanu se i tulou le taeao. E pei foi o le Malo o Fiti, e subsidise e le Malo mea ia o feed ia e ave i puaa, tulou, ia ma moa. Na fai le matou faalavelave o le maliu i le taimi tonu lava na short ai le moa, sole, se e pei e valea. Aisea? Le mea la lea e aoga ai le mea lea o le TVET, tatou polokalame ia e fia aumai, short courses a le Matagaluega o Faatoaga, e aoao ai le faiga o mea ia o lafumo. O le a le faiga e fai ai pe a maua i le faamai, aemaise lava pe a maua i le ua falo. Ia aua o aso ia, a ua falo fai mai,

tulou, se feula mai tua. A o aso nei, o lea ua i ai foi tulaga faapena, e fia maua la nisi e omai e aoao mai po o a skills, o a mea e fai, short courses ia faigofie. Aemaise foi tulaga o faafaatoaga faaonaponei, aua e fiafia lava lo matou itumalo e omai e auai. Ae a fai mai e fai i Apia i le Millennia, pe fai i fea ia e tau siisiigata foi le itumalo.

Ia, ona ou oo mai lea i le vaega lea o le gataifale. Ia, sa faatalatalanoa foi nisi ua i ai le expertise ma tulaga faapea o le gataifale. O le fautuaga na fai mai, e mafai ona faatino ia atinae pe a tatou taumafai e uunaia faapaaga ma atunuu pei o Amerika, Iapani, ia ma Saina, leaga e fai si taugata, e faaoga ai le tatou economic zone foi lea e 200 maila. Ia na ona tuutuu atu faapena, e le faapea na fausia Roma i se aso e tasi, a o nai mea lava faapea e tuutuu atu i tafatafa ane e fesoasoani.

Ia ma le isi manaoga o matou faamolemole, e tasi a le maketi o ia lea e i i. E fia fau sina matou maketi o ia. Ua i ai foi le nofoaga i tafatafa o le maketi o i ai nei i fua o faaeleeleaga, fau se maketi o ia. Tasi lenei itumalo o la e faafofoga mai, e tele le agaava i vaa fagota ma le aufaifaiva. Ua uma foi ona o atu nisi e i ai le poto faapitoa fai mai uunai le poloketi lena e faigofie o lo o i ai le sami ma le vai i autafa o le maketi e faigofie ona faatu ai. Vaavaai i le tulaga foi lea, a omai loa tagata mai Niu Sila ona faatalitali po o le a se oso e aumai, a le o le maso, paua po o le Kentucky. A o Ausetalia ia o mea a ia o ula po o prawns. Po o le a foi le mea e le taumafai tatou, a faapea o le a e alu atu i o i Faleolo e te malaga i fafo avatu lau order i o i le makeki i Afega piki up lelei a ua uma ona package lelei tulaga o i'a ota, e te taunuu loa o lau oso lena. Le toe manao i ni oso o ni talo ma luau o la ua tele. A o nai mea faapena ona o la tatou aganuu, a e alu e ave lou oso. Ioe, ia na fiafia uma lea o tatou, masalo ua lava ia na mea i le makeki i na i le vaega o faatoaga.

Ona me'i mai lea i le vaega o Alamanuia ma Leipa.

FOFOGA FETALAI: Ou te vaelupeina le saunoaga a le sui usufono mamalu. Ia talu ai ona o lea ua oo mai i la tatou taimi malolo, malologa masani a le Palemene. Ia ua ou manatu foi se i fai sina au koma ona tatou omai lea mai le malologa ma faaiu mai loa ma lau saunoaga. O lea lava e tuuavanoa atu lava ona o lou taimi muamua. Ia ae manatu o lea ua tele lou sao.

O le mea lea ua faataatiaese galuega a le Fono Aoao Faitulafono mo lana malologa masani.

Susuga MAULOLO TAVITA AMOSA: Ia o le a faapea ia ona fai. Faapea lava o le a tulai mai loa o le a faauma atu loa ae ui i lea ia faapea ia ona fai.

Na faataatiaese Taulumaga a le Fono Aoaofa Faitulafono mo lana malologa masani i le itula e 10:45 i le taeao ma toe faaauau i le itula e 11:26 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofa Faitulafono.

I le toe taliu mai i le tatou malologa i lenei taeao, ou te talitonu ua tau fai maua le faasiligamalosi e toe faaauau ai le tatou galuega.

O lo o i ai le tatou lafo e fia faatuina. Ou te tapa lau Afioga i le Palemia mo le lafo.

LAFO MO LE SUIA O ITULA FONO

Afioga Hon FIAME NAOMI MATAAFA (Palemia): Faafetai i lau Afioga i le Fofoga Fetalai. E faatalofa atu foi i le Maota, ua matu fau i le taliga o le sua. Faafetai i le Ofisa mo le tapenaga.

Ae lau Afioga i le Fofoga Fetalai, i le matauina o le faagasologa o le tatou galuega, o lea o le a maea tatou Saunoaga Faa-Taupou, ma e taua tele ma momoli atu le faamalo i sui usufono fou i a latou saunoaga.

Ae mo le faagasologa o le tatou galuega, e i ai se manatu e faatu se lafo e toe teuteu a tatou itula galue mo le aso ma e faapea ona faatu atu ai le lafo, *Ina ia faaopoopo se isi a tatou Fono i le afiafi i le itula e 6:00 seia oo atu i le itula e 10:00 mo le aso.*

O le lafo lea lau Afioga.

Faaluaina e le Minisita mo Faatoaga ma Faigafaiva ma le Sui Palemia.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2021/2022.

FOFOGA FETALAI: Ia, na ona toe faamanatu atu i le itu i saunoaga a sui usufono mamalu mo le tausiga lava o le mamalu o le Palemene. Ia, e lelei lava le ui mai pea o a outou saunoaga i le Fofoga Fetalai, ina ia tausia ai pea faiga masani faa-Palemene. A toe tomanatu i saunoaga a le sui usufono mo Falealili 2 ma Safata 2 i le aso ananafi, e ese le manaia, e maea lava o mulimulitai lava i faiga masani ia. E le ona o au, tulou le gagana, ae o le tausiga o le mamalu o le Nofoa ma le Palemene. O le tiute lava o le Nofoa o

le faamanatu atu o tulaga e faatumauina ai pea le mamalu o a tatou taualumaga.

E faataatiaese taualumaga mo le tatou malologa o le taeao o lo o saunoa le sui usufono mo Sagaga 2. O lea ou te tapa lau Afioga i le sui usufono e te tulai mai mo le faaauauina o lau saunoaga. Ma le agaga faaaloalo, le sui usufono mamalu.

Susuga MAULOLO TAVITA AMOSA: Faafetai i lau Afioga i le Fofoga Fetalai. Ia, ua see mai sau faamatalaga i le Afioga i le Minisita o Alamanuia ma Leipa e auala atu i lau Afioga i le Fofoga Fetalai. E tasi lava si mea sia e fia avatu ai se tuualalo, ona o le matou itumalo e feoloolo foi le aufaipisinisi laiti, e tele ina latou faafaigaluegaina tagata ia e tau o casual workers po o le au togiaso. A o se faafitauli la e i ai, pe 1, 2 vaiaso ua mou atu, saili atu ua i ai nai mea ua faaletonu i taimi o le galuega. O le uiga la o le faamatalaga, po o le a se finagalo i lau Afioga i le Minisita o Alamanuia ma Leipa e auala atu i lau Afioga i le Fofoga Fetalai, ae fai se faiga e mafai ai ona resitala ma faamauina tulaga o ID e mafai ai ona i ai faamaumauga o casual workers i le tulaga foi lea e lelei mo tagata faigaluega, e lelei foi mo tagata e ana galuega. A faapea foi la o ai sa e faigaluega ai e moomia sina reference laitiiti, ia e faigofie ona fesootai mai le employer agai i le Matagaluega, se i sue ane lava le tagata lea i lona ID lea. Fai mai, ia, e sao e faapea ma faapea. A manaomia foi ni tagata faigaluega, ia e sue atu lava e fesootai i le Matagaluega o lena e maua i ina records uma o latou ia e faafaigofie ai tulaga i le faatinoina o ia foi vaega o le galuega. O le auaunaga e manuia ai casual workers, e manuia foi le aufaipisinisi ma uunai atili ai le private sector aua le tamaoaiga o Samoa.

Ona ou oo mai lea i le Matagaluega o Faamasinoga, le Afioga i le Tamaitai Minisita o Faamasinoga e auala atu i lau Afioga i le Fofoga Fetalai. Ia na ona avatu sa matou tuualalo, se i silasila ane lava i mataupu o lo o noatia ai mataupu a lenei itumalo. Ua fai sina umi o taatia tulaga o Faamasinoga o talosaga la e noatia ai le eleele lea e i ai nei le Kolisi o Sagaga. Ua fia faaopoopo nisi atinae, ae o lo o i ai le to'a i ina. E faapena foi la le fanua lea ua fuafuaina e fai ai le falemai, ua maea foi tulaga o faamasinoga, ae laitiiti lava, e tasi lava si aiga lena e i le tulaga o faamasinoga o talosaga, ia a oo loa ina mautu, ua fofoga atu loa ina ia faatu loa se falemai o le matou itumalo.

Ma le isi vaega mulimuli lea, o le mataupu lea i le tuaoi o le matou itumalo ma Sagaga 4, le afioaga o Levi i Saleimoa. O le mataupu lenei e le fou, ma na oo mai lava i luma o le Kapeneta. E 4 lelei afioaga e aafia i le tuaoi lea, ma o faaiuga o faamasinoga ua maea ona fai i le 60 tausaga talu ai, pau lava le mea toe ina faatino. O le popolega, ina ne i feala feala tulaga ia i latou o lo o galulue ai, ia tulai mai foi se faalavelave pei o le mea na tupu i le 1960, e aafia ai tele la le afioaga o Tuanai ma nisi o le afioaga o Leauvaa. Ae a oo ina taoto i lagatonu le tuaoi lea, ia ona faigofie lava lea ona galulue fiafia, a

o la e ua uma ona tosi lauti ma faatino tulaga o tuaoi pei ona i ai faaiuga o faamasinoga. O le eleele e aafia i lea mea, e le i lalo ifo o le 1,000 eka. O le faafitauli ua feagai nei, ona ua noatia Afega, noatia Tuanai, ia ma se vaega o Leauvaa ona toe galueaiina, ae o la e tatala le avanoa ia Levi Saleimoa e galueaiina ai eleele ia. E pei o le tasi lea mea ua matou fiu foi e tui mai le Matagaluega, ua le malamalama po o fea ua fai i ai lenei mataupu. Faamolemole se i e toe silasila ane lava i ai aua lava le galueaiina o le lauta foi o lenei itumalo aemaise foi le nofo filemu o latou o lo o galulue ai.

Ona ou see mai lea lau Afioga i le Fofoga Fetalai i le mataupu lea e fia agai atu i le Minisita o le Matagaluega o Eleele ma le Siosiomaga. Afai o se vaega ou te le o mautinoa, o le tulai mai foi o le faigamalo i eleele faaleaganuu, ou te tatalo atu mo le afioaga o Malie, a silasila i le afioaga o Malie, e le mamao ese lava i tua ma le aai, muta loa o latou fanua la e faaaoga e le SLC, ioe. Meamanu o le taimi lenei ua amata ona vaevae ae le i i ai ni tulaga mautu. Pau lava le isi mea o lo o tua i ai le afioaga o Malie, o le eleele i Folasaitu, e lata agai i le Tuasivi. A o le va atoa i le alu atu lea, e le mamao ese lava ma le aai i tua mai lava o maota ma laoa o Malie, ia ona leai loa lea o ni eleele e tua i ai, o lea ua i ai uma i le SLC. Po o le a se fua se i silasila ane i ai i se faiga fetuunai. O le mea ou te faafetai ai, o lea e faamamafa foi i le faigamalo o tulai mai le tulaga i le aganuu, aemaise luitau o tulai mai, tatou te faamoemoe i faatoaga ma mea faapea e tua i ai o tatou tagata. O le gataifale ua tele lava le aafia, pe mafai ni polokalame foi mo le toe totoina o le togo i le gataifale o le itumalo atoa. Ua aafia tele le tolotolo i Afega faapena Malie, e moomia ai tulaga o nai taligalu ma mea faapena e fesoasoani ona ua tele le aia o le eleele.

Ia, see mai lea i le Matagaluega o Tina ma Tamaitai ma Pulenuu lau Afioga i le Fofoga Fetalai. Ia, faanonomanu ia aua le sailiga matagi foi ma le siiga gasegase a le Afioga i le Minisita. Ae foliga mai o le Matagaluega lea ua faamoemoe tele i ai le faatinoga o tupe ia o le a ave i tua. I le vaavaai i ai i le tulaga lea, e pau lava le mea foi lea o lo o tau tuufesili ai, pe i ai se avanoa o se isi mai le Matagaluega ina ia faamalamalama lelei mai ai. Aua e oo foi i le matou itumalo, o lea ua uma ona filifili le Komiti Faatonu. Ia, e i ai lava nai fesili e fia maua tele ai le malamalama, ia ona faapena lea ona faatino. O le tulaga lea ua vaai atu, pe le i mamafa tele layers lea e i ai i le tulaga o lo o faataatia mai ai. Ia tailo, ae pei o le faanaunauga lava, ina ia vave ona faatino lea faamoemoe. Ma e ou te manatu foi, o le Matagaluega tonu lea e nafa ma le va ma alii ma faipule. O se avanoa lelei o le polokalame lea ua aumai i lalo o le Matagaluega lea, o le avanoa lea e taufai galulue faatasi ai le Malo ma le pule mamalu a alii ma faipule o afioaga, e pei foi la o le matou itumalo, ina ia mafai ona faatino le faamoemoe lea, o lea ua amata ona decentralize mai resources po o lea ua faasoa mai tua i afioaga tulaga tau le seleni e faatino ai manaoga taitasi o itumalo.

O le Mataluega o Galuega. Ia, ua feoloolo lava le tele o ala galue, vagana la Afega. Malo faafetai i lau Afioga i le Minisita e auala atu i le Fofoga o le Maota nei. Manaia le amatamea, ae i ai le upu foi lea, matou te le vavevave se i fofoga Savaii, se i fofoga lau Afioga i le Minisita ina ia faauma lelei lau galuega lea sa fai, ua manaia lava ma matagofie. Aua afai nei ae sau timuga ae toe afaina, e pei ona saunua ai nisi o sui usufono, ia o lona uiga o le suafa o lau Afioga o le a talanoa i ai i le malu taeao, talanoa i ai i le taumafataga o le aoauli, toe talanoa i ai i le taumafataga o le afiafi le itumalo pe afai ae afaina ae le i maea, ioe. Ia ailoga lava e tele lava se vaegatupe? Leaga o lea ua ou vaavaai atu i le polokalame lea e ui mai le Matagaluega o Tamaitai ma Puluu, e le tagofia ai galuega tetele faapea, pei o mea ia o auala galue. Ia ae na ona tuu atu i ou tafatafa lau Afioga.

Ma le vaega la lea o le Pulega o le Suavai, lau Afioga i le Fofoga Fetalai. E i ai aiga i uta o le matou itumalo. O le mea la e tupu, ona o faiga faavae lava a le Matagaluega, e tu i tafatafa o le auala le mita, ona alu lea o le paipa i aiga ia e i tua, ae i ai aiga e oso atu ai le paipa lea faatoa oo i fanua o le aiga lea e totagia le mita. O le mea lea ua tulai mai, ua afaina le va lea, tulou, ua faaleaga le ofe lea ina ia maua le suavai e le aiga lea, ae tigaina ai le aiga la e i tua atu e totogi le mita. Ia, ua tele foi taumafaiga atu i le Matagaluega, o le tali lava o faiga faavae. Ia ae se i silasila ane lava, ou te talitonu o lau Afioga ua masani foi i tulaga faapea e te talimanao mai. Ia, o se matou tatolo lea ma le faaloalo tele i lau Afioga i le Minisita o Galuega, aemaise foi i latou o lo o vaaia le suavai.

Ona ou oo mai lea i le Matagaluega o Tupe. Ia, lau Afioga i le Fofoga Fetalai, o lena ua silafia e lau Afioga i le Tamaitai Minisita manaoga o leni itumalo. A o nei mea uma, e faalagolago i lau faasoa ma le faagaoioi mai o le seleni. O le mea lea e matauina i tatou tagata Samoa, e fiafia puupuu, they get impatient pe a tuai ona faatino se galuega. O le taimi leni, ua mataalia uma ma le fiafia se i faatino mea ia ua agai i ai le tulai mai o lena foi itu o le tatou faigamalo. Ia na o se talosaga lena e avatu ai.

Ia, ona faauma atu lea o se upu. Atonu e aoga le faatuatuai ona ou oo mai i totonu o le Maota leni. Sa nofonofo lava i tua ma taputapu ai ma mataitu aga faaupufai o Malo. O lea ua tuana'i atu lena tausaga ma tulaga sa tulai mai. O le upu moni lava, po o a foi vesiga i lau lava matau, e tele foi mea lelei ma lesona lelei na tatou maua mai ai. Ia tatou apo lena e fai ma maea a lalo tatou noanoa i le tulafana ina ia mau le la o lo tatou sa ma faatonutonu folau ai la tatou folauga i leni tausaga. E i ai mea ua mafua ai sau faamatalaga, ae na ona tuu atu i tafatafa o lau Afioga i le Tamaitai Palemia, le Kapeneta ma le Malo.

E matauina nisi o polokalame o poloketi ua uma ona faataatia, ae vaai lava ma le popole ina nei le faataunuuna. O le faataitaiga, o le faatanoa lea i Alaoa, e na ona avatu lava o se matou tuualalo i galuega faa-Itu Agai. Ona e maua o alatupe e faatino ai lea poloketi, o le grant. A tuai ona faatino, e au

ina toe faafoi le tupe lea. A tuai foi ona faatino, e au ina le atoa tino o le tama i lea galuega, ona sa fuafua lona tau e tusa foi ma le tau o mea sa i ai. A e silasila foi, e leai se tatou mea e fai pe a alu i luga mea mai fafo. E vaai i le tagasima sa \$22, o lele ua agai atu lava i le \$37, \$38. Ina ne i faateletelegese la, ae fai ane lea poloketi, ua tele se tupe e ono manaomia ai, ae popole ai foi la ina ne i toe foi le seleni. Ia o nai avanoa ia, o lea e tausaili atu tulaga e maua ai galuega mo tatou tagata.

Ia faapena foi le fuafuaga foi i le alafaalava i le alu atu i Aleisa seia paia Faleolo. O le tulaga lava ia o mea faapenei, o lona ua tulai mai le FAST o le tatou Malo lea. Ua matou tulai atu i le Itu Agai, avatu le matou lagolago. Aua a tatou le tutu faatasi, e faigata. Ona manatua ai lea o upu o le saunoaga a Abraham Lincoln a o avea ma Senator i le 1858, a o fetotoai le Malo i le mataupu o pologa. Na fai mai a ia, po o le a le malosi o se fale e fau, ae a fetotoai ma fefulituaai le anofale ma le lotoifale, e le tu lona fale. O le agaga lona.

Lau Afioga i le Fofoga Fetalai, ua uma atu foi, e pau lava o lea. Ia talosia ia, aua le avea a tatou finauga faapati o ai e sao a o ai e malosi, ae galo ia i tatou le atunuu ma le tapuaiga.

Lau Afioga i le Fofoga Fetalai, faafetai mo le avanoa. O le upu moni, a ou vaai loa i lau afioga, se ou te manatua lava Mataniu Feagai ma le Ata. O oe lava, ioe, o le lupe na fa'ia mai le fuifui. E le o se upu e aveane ai. E leaga e faigata o taeao o Samoa. O le taeao o lea ua ao ai Samoa i le Talalelei. A ou vaai atu foi i tafatafa o le Afioga i le Palemia, o se tasi foi o suli ua filifilia mai i Malaeola ma Gafoaga. O lona foi e tulai mai foi Faleu ma Utuagiagi, sui usufono se ua atoa taeao iloga o Samoa i lo tatou Malo.

Ona faauma atu ai lea o sau faamatalaga, le tapuaiga a le Afaigaluega paia a le Atua i le itumalo o Sagaga 2, aemaise le au Ositaulaga i lo matou nuu o Afega, ua faamalo le tapuai. Ia tatalo mai, tatalo mai pea i galuega a le Maota nei. O se upu ua paulua i le faafofoga foi a Samoa, aemaise le Maota nei, ia foi mai.

Lau Afioga i le Palemia, ia maua le lototele, faamanuia le Atua i lau afioga. Ia faamapue mai i lou fofoga se faatofalaiga, e tapasaina ai le folauga a Samoa i lenei tausaga ma lenei Paeaiga.

Ia manuteleina le tapuaiga a Samoa, manuia foi le afaigaluega a le Malo ma vaega foi o lo o taufai galulue, malo le galulue ma le auauna. Soifua. Amene.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Sagaga 2.

FOFOGA FETALAI: Ia, malo faafetai saunoa lau susuga Tuisamau, o lea ua folasia i le Maota lou finagalo. E taua tele fautuaga e pei ona tuuina mai, aemaise foi le popolega mo le agai i le lumanai. Ia aumai laia o lou

faatuuatua o lea e afio atu le tamaitai Palemia ma le Faigamalo. O lea faatoa tau amata, o le a silasila lava i tulaga uma e pei ona fautua mai. E taua foi le fautua mai i aoaoga aemaise foi o le tulaga i le tatou aganuu. E talitonu foi, ua aoga foi lou taimi sa e galue ai i lo tatou Malo ma le Iunivesite, o lea ua maua ai le fesoasoani mo le agai i luma o le tatou atunuu, aemaise nai fanau.

O le mea lea, faafetai mo lou sao, malo lauga. O le taimi lenei o lo o avanoa lo tatou Maota mo se sui usufono e fia saunoa.

Ua ou vaai atu ua malilie uma lo tatou Maota i le Tala Faaopoopo o le Tupe, o lipoti.

Tulai mai lau Afioga i le Palemia

Afioga Hon Fiamé Naomi Mataafa: Lau Afioga i le Fofoga Fetalai, a leai se isi e toe fia saunoa, ou te manatu pe faagasolo loa le tatou galuega i lona tulaga masani.

FOFOGA FETALAI: Ia faafetai, e manatu, o lea e matau atu e leai se isi e fia saunoa i lenei taimi.

O lea e matau atu o lea ua tulai mai le sui o le komiti. O le a e saunoa e faamalamalama le tou lipoti pe...

Afioga Hon Tapunuu Niko Lee Hang (Vaimauga 3): E muamua ona momoli le faafetai i lau afioga mo le avanoa. O lea e fia fesili pe ua leai ma se isi e toe lauga leaga o matou e mulimuli lava. A leai la se isi, o le a ou amata atu i le matou komiti. Ma le faaaloalo lava.

FOFOGA FETALAI: O lea lava e tuuavanoa lava le Nofoa, i outou faapea mai ua gausia e le Nofoa nisi tulaga. A o le mea moni lava o lo o maua le avanoa. E lelei foi lo tatou felafuai, i lea itu ma lea foi itu, pe a faapea o lea ua... o lea ua toe faaopoopo isi tatou itula galulue.

O le avanoa lenei. O lea ua ou vaai atu ua fofou mai Faasaleleaga 5. Tulai maia e faaauau si ou le sauni lena ua i ai i lenei taimi.

Afioga PESETA VAIFOU TEVAGAENA (Faasaleleaga 5): Lau Afioga i le Fofoga Fetalai, e na o le fia piiama atu lava, o lea ua uma ona e malele. E masalo e uma loa au, ona pasia lea o le Tala o le Tupe.

Lau Afioga i le Fofoga Fetalai, e faafeiloai atu ma faatalofa atu i lau afioga. E faatalofa atu foi i le paia maualuga o lenei Maota i ona tulaga faalupe.

I le afio o lau Afioga i le Tamaitai Palemia, afio foi lau Afioga i le Saoalii, lau Afioga Tuala. O le mamalu i lo outou aiga Kapeneta. E faapea foi le afifio o a outou afioga i Minisita Lagolago. O le maualuga o lena itu o le Malu.

I lea foi itu i le afio o lau Afioga i le Sui Taitai faapea foi le lautele o le tatou Vaega Faaupufai. E avea foi lenei avanoa e faafeiloai atu ai, i le paia

maualuga i Ofisa Sili o Pulega o Matagaluega o si o tatou Malo. I le afio o lau afioga i le Tamaitai Loia Sili, aemaise foi Ofisa Sili o Pulega o Matagaluega Tumaoti.

E faafeiloai atu foi i lau susuga i le aao tusitusi ma lou soatau e faatonufoiauina galuega a lo tatou Maota.

O le tapuaiga maualuga a si o tatou atunuu, i tama ma tina matutua, faletua ma tausī, saoa ma aualuma aemaise foi le malosī o tatou nuu, faapea foi le atunuu.

E faatalofa atu foi i le paia maualuga, auauna totofi a le Atua, mo la outou galuega faifaipea i aso uma, aua tatalo aua soifua laulelei i lea aso ma lea aso i si o tatou atunuu.

O lenei avanoa ua maua e lou nei sui usufono, ou te faafeiloai atu ai foi i si ou itumalo. Lo tatou itumalo, faamalo tapuai. E talitonu lava, o la ua nofofale foi tulaga uma e pei ona i ai le faamoemoe o le tatou itumalo, i lenei foi Paeai. E tau ia ina tuu i luma o le Atua lo tatou faamoemoe.

A o lenei avanoa e momoli atu le agaga o le fiafia ma le agaga o le faafetai i lau Afioga i le Fofoga Fetalai, o lea ua matau atu, o lea ua see malie atu lava lo tatou sa i lenei tausaga. E talitonu foi ua mavae atu na futia. O le agaga i lou nei sui usufono, ia tatou faafetai maua le agaga o le galulue faatasi. E avatu foi lo matou lagolago atu, ae le mafai lava ona tuua se matou faufautua ma lapatai atu. Ona o le tatou galuega e fai faatasi, aua foi le manuia o Samoa ma ona tagata.

O le matau atu i le Tala o le Tupe o lea ua faataatia i le Laulau a Fono. E masalo o lea ua faigofie lou nei sui usufono. Aua o lea ua ou vaavaai atu, o lea ua i ai suafa o le Komiti sa o latou lagolagoina lenei Tala o le Tupe. E oo foi i lenei itu, o le Komiti foi o le la itu ma le Taitaifono. Ou te talitonu foi, ua leai se faafaigata o le Tala o le Tupe. E lagolago foi e lenei itumalo le Tala o le Tupe, ona ou te manatu e le o se Tala o se Tupe tele, ae faafetai i le Atua i Lana foai. E faafetai foi, e ui lava ina tatou sailiili i lea itu ma lea itu i mea e manuia ai le atunuu. O le avega lena ua lafo atu, e na ona matou paipaiama atu ma faufautua atu. E pei lava ona ou avatu, o le tatou galuega e faifaatasi.

Ona manatu ai lea o lou nei sui usufono, e momoli atu ai le agaga faafetai i lau Afioga i le Minisita o Tupe. Ua faamalo le tapena, aemaise foi o Ofisa Sili o Pulega o Matagaluega a le Malo o lo o feagai ma le Tupe, faapea foi la outou komiti, i le tapenaina o lenei Tala o le Tupe.

Ona ou manatu lea, ou te toe oo atu lava i lau Afioga i nai nisi foi o tuualalo.

Ae o le a amata atu ia se manaoga o lenei sui usufono, na o ni nai tuualalo ma fautuaga lava. Aua foi le faagasologa o le tatou galuega i le amataga o lenei tausaga.

Ona amata atu lea i lau Afioga i le Minisita o Aoga. E momoli atu le agaga o le faafetai i lau Afioga i le Minisita ma le Matagaluega. E faalogologo foi ma le totoa i nisi o saunoaga a sui usufono. E faafetai lava mo nisi o fautuaga

ma timaiga foi i le tatou Matagaluega. Aua ou te talitonu, e pei o le tafue lava lea o le lumanai o Samoa o lau Matagaluega. Aua e mulimuli ane faatino le tautua a le tama ma le teine se i tulou lenei Maota. Ae pei o lau Matagaluega e amatamea ai le ola soifua o le tagata. O le mea lea e momoli ai lau faafetai ma lau faamalo i lau afioga ma le Matagaluega.

O le tele lava o taimi, a ou nofo mai foi i lena itu, ou te tuualalo foi i Minisita o Aoga i na foi vaiata. I le polokalame lea o le APTC i le Iunivesite. Ona ou te talitonu lava au ia, ua tele mea tutupu i le lalolagi, ua tele faafitauli. Ua oo foi i tatou resources ua tele ina faaletonu, ona o tulaga ua i ai faamai, suiga i le tau ma mea tutupu. Ua tatau ona toe silasila lo tatou Malo i nisi o tulaga e vave maua mai ai nisi o tomai, e mafai ona fesoasoani ai i o tatou aiga nuu ma afioaga, aemaise lava i mea tau tamaoiga.

E faafetai foi i le toatele o nisi o si o tatou atunuu, o le toatele foi o tamaiti aoga e pei foi ona saunoa nisi o sui usufono. O le toatele o tamaiti aoga ua le iu aoga. E pei a oo atu loa i le Vasega 9, o le Vasega 10, o le toatele lava ua muta ai i ina le aoga. Ae tatalo atu i lau Afioga i le Minisita o Aoga, i tulaga tau skills ona e eseese lava taleni na aumai e le Atua i le tagata soifua. Ia i lau matau ma lau vaavaai i totonu lava o lo tatou atunuu, e oo lava foi i lou aiga. A ou fesilisili atu nei i le toatele o tamaiti, e pei lava e fiafia e ave le faaloia, e pei e faapena.

E talu ai, ona o lau matau e manaomia le toe silasila o lau Afioga i le Minisita i nisi tulaga e faatosina mai ai ia skills eseese e pei o trades. E pei o tulaga ia ua i ai le polokalame manaia lea a le Malo o Ausetalia. Ona a silasila lau afioga i le APTC i skills ia e i ai, e le o ausia le standard. O le toatele lava o tamaiti ua iu mai ma tusipasi ia lea e tele faapea ua atoa itula. Ae o le tulaga ma le malamalama la e i ai, e le o ausia e le tamaititi aoga le standard e mafai ai ona iu mai sau i tua faatino ai le galuega.

Ou te faafetai foi i lo tatou Malo, o lea ua matau atu i nai galuega faavaitaimi ia ua ave i fafo. O lea a silasila i ai lau afioga, ua tele lava ina sue galuega mai Kamupani mai fafo, aemaise foi o Niu Sila ma Ausetalia. O le faakamuta, palama, fai uila, e pei o skills faapena. A e o le toatele o nai tamaiti ia e iu mai i le APTC, e le o ausia e tamaiti le maualuga ma le standard e mafai ai ona faatinoina galuega nei. Aua e ese lava le sau ua complete mai le aoga i uta...

Ae o lau talosaga lau afioga i le Minisita, pe mafai ona toe tatalo i le Malo o Ausetalia, ina ia toe faapoopo se isi polokalame. Ia fai level, ina ia mafai e le gata ua complete le level lea e i lalo, ona toe mei atu lea i le isi level. Ina ia mafai e le tamaititi ua iu mai, ua mafai ona faatino galuega.

E pei o sau talosaga lena lau afioga, ona ou te talitonu o le toatele o alo ma fanau a le atunuu, ua feofeoi, ua tele lava o tamaiti ua tatou matauina ua feoi ma oloa, e o faatau solo i le taulaga, ua leai ni galuega e tua i ai. Ou te talitonu lava au, a maua se fesoasoani i tulaga faa-APTC, faa-Aperenitisi talitonu o le a tele le avanoa e tua i ai alo ma fanau a si o tatou atunuu.

Ona ou oo mai lea i lau Afioga i le Minisita o le Soifua Maloloina. E momoli atu le agaga fiafia ma le agaga faafetai. E faafetai i le matau atu, ua tau le faalogologo lava i nisi foi o mea tutupu mai uta i le tatou Matagaluega. O le tele lava o mea tutupu, o totonu lava o le faaleleia o mea e tua i ai le Matagaluega.

Ae sa taua e se tasi o sui usufono, e sao lelei lava i le tulaga lea, se i toe silasila ane lava lau afioga i le Minisita. I lifi o le tatou falemai i uta i Motootua. E leaga o lea sa ou alu atu i le vaiaso lea na tea nei, o lou iloa o le tele lava o lifi e le o ola.

O le isi vaega taua lau afioga, o le tulaga lea ou te vaai pea ma le popole i le auaunaga lea mai le motu tele, o le ta motu foi mai Salafai, i taimi ia e aumai ai gasegase po o mai mai Tuasivi e taunanati mai i le falemai tele. Lau Afioga i le Minisita, ou te matauina lava ia tulaga, ua tele foi mai e valaau lava le Atua e le i oo i uta i Motootua. Ona o lau matau, e pei e tele lava ina omai ambulance nei e aumai ai mai, ma gata i Leulumoega. Ae o le faalavelave i lau matau, ou te fesili pea pe aisea, e le faaauau ai le service lea, faaauau pea i uta i Motootua, nai lo le aumai o le ma'i mai Tuasivi ae toe tu i Leulumoega. I lau vaai, aua sa ou talanoa i le avetaavale lea, e toe fia tuli e le avetaavale le malaga e toe foi a le vaa lea na sau ai, e toe fia foi lava i le malaga lea. E talu ai, ona e le o lava taavale po o ambulance e faatinoina le auaunaga i Tuasivi.

A o lau tatalo atu i lau afioga, se i silasila ane pe le tatau ona toe faaopoopo se isi taavale mo le falemai tele i Tuasivi. E faapena foi i Leulumoega. Aua o le mea moni i lau matau, a oo mai le taavale i Leulumoega tuu le mai i Leulumoega ae toe foi, ae leai la se taavale i Leulumoega. A o le mai lea e aumai o se mai o lea e nanati mai. O lona uiga e faamuta ai i ina le soifua o le mai. O se tulaga faapena lau Afioga i le Minisita. Na ona avatu lava o se fautuaga, se i toe silasila lava lau afioga i le tulaga lea.

Lau Afioga i le Minisita o Leoleo faamalo faafetai, o lea ua amata foi galuega o lenei tausaga. E faalogologo lava ma le totoa i le tulaga lelei o i ai le faaatinoina o galuega a si o tatou Matagaluega. Ma e talitonu foi, e tele lava vaega taua e ao ona silasila i ai lau Afioga i le Minisita. Ona ou te manatua le taimi sa i lalo foi o le Afioga i le Taitai le Matagaluega lea, ae sa ma galulue faatasi ai ma le Taitai i lona taimi, i le Matagaluega o Leoleo. Ma sa faalogo lava i tala lava feaveai i totonu o le Matagaluega, i auala ia e oo mai ai laau faasaina i totonu o le atunuu. Ae sa taumafai lava se auala foi lea e mafai ai ona faamaonia, ma ia faamautuina le oo mai o fualaau faasaina nei i totonu o lo tatou atunuu.

Ma sa masalomia lava i nisi o faamatalaga, ia vaa foi nei o vaafagota ia a tatou. O alia ia, e pei e omai vaa mai Amerika Samoa, fetau i gatai i le moana, fepasiai mai i tatou vaafagota ma aumai i uta. Ae sa silasila foi le Komesina ma le Matagaluega o Leoleo i na vaitaimi. Sa tau saili lava se auala ina ia faamautuina ai le lipoti lea, peitai lava e le i maua i lona taimi.

O le popolega la, o lea ua faaletonu nei lo tatou vaa lea sa vaavaaia foi le tatou gataifale. Ae se i toe silasila ane lava lau Afioga. O le mea lava e tataua ona i ai, ae ona o le taugata, e tataua ona i ai se tatou satellite. E pe le mafai ona tuu atu se tatou talosaga i le Malo o Ausetalia, pe le mafai ona aumai se satellite i luga. Aua o le tele o cases nei, e pei o le faalavelave na tulai mai Vaitele i se tasi foi o alo foi ma fanau, o lea e oo mai i le taimi lenei o tau saili le mafuaaga o le maliu. E tasi lena auala e silasila i ai lau Afioga i le Minisita. Aua o le satellite po o le po, po o le pogisa e maua uma lava. Aua po o fea lava le taavale na lavea ai, po o le tagata na faia e maua a i luga o le satellite.

Ae se i toe silasila ifo lau afioga, ou te iloa e taugata, ae po o le a se auala po o se grant po o le a se isi mea e fesoasoani e mafai ai ona saili, o le tele foi o solitulafono i totonu o si o tatou atunuu.

Ona ou oo mai ai lea i lau Afioga i le Minisita o le Matagaluega o Vaalele Savili. Ou te talosaga atu lava i lau afioga, ona o tulaga ia i tau o oloa. Ua ou avatua Vaalele Savili e faapuupuua atu ai, ona ua fai si taugata tele ona tau lau Matagaluega. Ae ua ou vaai soo lava i mea ia e tutupu i pisinisi ia e i tua. O le tele o pisinisi ia, a e vaai lelei lava i pisinisi ia e totogi ai faatau, e le o taua mai ai items ia lea e i totonu o lau faatau. Ae pau lava le mea lea e manino i lalo, o le GST. O le uiga o lau faamatalaga, pe i ai le auala faasolitulafono lea e fai e le tele o pisinisi ia e i tua. Ona e i ai oloa e maualuga a latou tax, e i ai oloa e tax free. A e silasila i ai i le tele o pisinisi ia, ua aumai nei le lisiti, ua faaopoopo mai ai ma le tax, ae ua le itemize mai po o le a mea o le oloa lea ua avatu e totogi ai lau faatau. E manaomia lava se talosaga i lau afioga ma le Komiti, pe mafai ona asiasi i tua i pisinisi. Ona ua tele pisinisi eseese lea ua i totonu o le atunuu, aua ou te faafetai i isi pisinisi o la e lava e manino mai lava le oloa o lea e aafia i lau faatau. Ae o le tele o pisinisi ia ua ou matauina, ia e na ona aumai o le lisiti, ae e le o itemize ina po o a mea e i totonu o le faatau. O lona uiga o lea ua faaopoopo i ai le lafoga taugata i totonu, ia ae o isi o oloa e le o i ai se lafoga. Ia lau afioga e na ona fautua atu pea i le tulaga lea, ia se i ai se taimi ia na ou oo atu lea i lou ofisa e lelei lava le faamalalama atili o le tulaga lea ina ia faamautuina ai le... atonu o le tasi lea tupe tele o le tatou atunuu o lea e le o maua, o le tele foi o faipisinisi e le o faatino ma le amiotonu a latou pisinisi.

Na ou oo mai lea lau afioga i le Minisita o Galuega. I lau vaavaai atu i le Tala o le Tupe, o lau Matagaluega lau afioga i le Minisita o le isi Matagaluega o le tele ia o manaoga a sui usufono mamalu. Ae a ou vaavaai atu i le tulaga lea e le o siisii i luga le Tala o le Tupe a le Matagaluega. E le o tele foi se tupe o faamoemoe mo le faatinoina o nei galuega e faalogologo atu ai i le tele o sui usufono, auala galue, street lights o le vai taumafa. Ia se i toe silasila ifo lau afioga pe o le a se isi faiga e mafai ai ona faatino ai nei auaunaga. O le ala foi lea e le avatua ai se talosaga a lenei itumalo i ona

auala galue ona ou te vaavaai atu, e alofa atu foi i le paketi a le Matagaluega, o lo o tau faasoaso a lau paketi.

Ae sa ou lauga i le amataga i le Tala o le Tupe i le tulaga lea e tupu mai i i agai mai i le itu Sasae pe a oo mai i le tulaga aemaise lava le taeao, pe a oo mai i i Vailoa ma Lepea. Lau afioga, se i silasila ane pe le ave i ai se faamuamua, aemaise lava ia le poloka o i ina pumper to pumper lava taavale i le tele o taeao, aemaise lava taimi o lea o le a ae aoga. Se i silasila ifo lava lau afioga pe le ave iai se faamuamua i le tulaga lea ae pe le tatau loa ona faatino mai le auala lea i Lepea i tai, Vaitoloa e oo mai ia Sogi tai, e tau fesoasoani ai i le tele ona ua tele taavale o lo tatou atunuu. Ua matua tele lava taavale i totonu o le atunuu ma e pei ua avea le tulaga lea ma mea ua tele ina poloka ai lava luga o le auala. E pei e na o le pau lava lea o se talosaga a lou nei sui usufono ona o lea e tele lava mea e ta te fia talosaga atu ai, ia ae fai fuafua foi i le Tala o le Tupe. Ia aemaise le tupe lea e le o se tupe tele lea e tuu atu i lau Matagaluega.

Ia ona ou oo mai lea lau afioga i si ou uso e pele ia te au le Minisita o Faatoaga. Ia e momoli atu lau faafetai faapitoa lava i lau afioga i le Minisita, ioe aua na ou manatu lau afioga i le Fofoga Fetalai, o sau Kerisimasi fiafia lenei ua ma feiloai ai ma si ou uso. Ioe ma e o au sa ou alu ou te asiasi i o i lou Taitai i le falemai i Motootua. Na ou alu atu lava lea ma ma talanoa ma le Taitai, ae te i ua sau foi se tasi foi o sikulati ma fai mai o la e fia vaai le Minisita e fia asiasi mai o Faatoaga.

Ou te faafetai la i le afioga i le Taitai ua fiafia lava. E le iloa po ua fiafia foi lea o lea ua afio mai ia le afioga i le Minisita e asi lona faatafagasegase, ia po o le fiafia ia te au aua masalo o lea ua iloa e le Minisita o lea e ma te i ai. O le agaga faafetai ia te au, masalo o le taimi muamua lava lea ua soisoi ai le matou Taitai ona ua afio atu le afioga i le Minisita o Faatoaga, ia atonu pe tasi lea o vaifofo foi lea ua vave ona maua le tino malosi o le Taitai. Ia e pei o le agaga lea e momoli atu ai agaga faafetai e pei o se vaa faaola. O le mea lea e fautua atu ai i lau afioga i le Minisita o Faatoaga, se se i tau faifaimalie, ioe. Sausau malie o lea ua matagofie o lea ua seese malie lo tatou sa i lenei tausaga, ioe. Ae o tulaga uma lau afioga...

Susuga Hon Laauli Leuatea Polataivao Fosi (Minisita mo Faatoaga ma Faigafaiva): Lau afioga i le Fofoga Fetalai...

FOFOGA FETALAI: Fai sina malologa a lau afioga i le sui usufono mamalu leaga o lea ua e taua le Afioga i le Minisita. Ia o le avanoa lenei lau afioga i le Minisita.

Susuga Hon Laauli Leuatea Polataivao Fosi: Faafetai, faafetai tele mo le avanoa. Sa leai lava se agaga ona o le tau faasaoina o le tatou taimi, ia ae leaga o lea ua saunoa le sui usufono mamalu e le gata mo le silafia e le Maota

ae o le faafofoga tapuai mai. O nai mea laiti e fia faamalamalama ma faasao, ou te le i alu i le falemai ou te alu e asi le sui usufono mamalu. O le mea lena e tataua ona faasao. Na ou alu i le falemai o lou alu e asi le afioga i le Taitai o le Itu Agai.

Mo le silafia foi e lau afioga i le Fofoga Fetalai po o fea lava e aga i ai ia tatou mea e fai, ia na maua loa le tala i taimi o puapuaga ma faigata, ia na ou manatu o le mea lea e tataua ona fai. Sa ou logo lou Taitai ma ou fai i ai se i ou alu ia i uta e vaai pe o le a le tulaga ua i ai le gasegase i le afioga ia Tuilaepa. Ia na ou sagisagi fiafia ina ua ou alu atu ma feiloai, ae ua matuai tumu au i le faanoanoa, na ou alu atu o la e i ai Peseta. Ioe na ou faapea si au mea sole.... it's the last person I ever want to see, aua o ia tonu lea e tupu ai le gasegase o le toeaina.

Ia ae ui o lea o lea ua saunoa le afioga ia Peseta, Peseta e tumau pea le mafutaga. O a mea nei e fenumiai ma o tatou felavasai, a oo loa i le taimi e te gasegase ai, o au lava e muamua atu. Ou te alu atu e fai lau tatalo ia e maua le lotu maualalo ma e faatoese i le Atua. Ae o le tatou tatalo fai faatasi, ia o lena na e silafia, e augani mai lava Tuilaepa e fia talanoa e tasi lau upu, malolo lelei e saili lou malosi. Ia ae talosia na e vave alu ese vave malolo ai si toeaina.

Ia o si au faamalamalamaga lea, ou te le i alu o Pese, na ou alu lava e asi ia le Taitai o lena Itu o le aiga. Ia ma lou faaaloalo.

FOFOGA FETALAI: Malo, ia ou te iloa ua manino lau afioga i le sui usufono mamalu. Ia o lea sa taua le... ia aso fiafia mulimuli ane o le lua asiga i le maota gasegase talu ai nei. O le mea lea, o lea ua e maua le agaga o le Minisita, o le Minisita alofa. O le mea lea ia tautuana ma oe e te mulimuli i le Minisita e alofa so o se tasi.

O le mea lea, faaauau mai le saunoaga a le sui usufono mamalu.

Afioga Valasi Luapitofanua Toogamaga Tafito Selesele (Minisita mo le Soifua Maloloina): Mo le faasaoina o le taimi o le sui usufono...

FOFOGA FETALAI: Ia tulai mai le afioga i le Minisita leaga o lea o le maota gasegase lea sa feiloai ai ia le Minisita ma le afioga ia Peseta.

Afioga Valasi Luapitofanua Toogamaga Tafito Selesele: O le mea e fia faamanino o le ala lea o lou tu atu.

Faafetai i le afioga i le sui usufono aemaise foi ia tulaga e pei ona iai lana asiasiga. Sa ou logoina lava ia le CEO ma le Matagaluega o ai lava e fia asiasi i le Taitai, leaga o le tiute lea o le Minisita.

E pau o le mea, sa ou oo foi ou te asiasi i le afioga ia Tuilaepa. Sa ou alu la ma lau teu ma lau faamafanafanaga. Na ou alu atu ou tatalo, tatalo. Ou te le o iloa la i le mea sa i ai le afioga ia Peseta pe na alu e faatiga le faiai po o le

finagalo o Tuilaepa pe toe faatupu foi ni isi mea e tele ai le le fiafia o le toeaina. O maua ma lau... sa faapea mai ia Tuilaepa, se na sau foi Laauli tatalo na ou lagona le mafanafana. Ia na ou tatalo foi lea lau afioga i le Fofoga Fetalai, fiafia le toeaina.

Ae ou te le iloa ailoga na tatalo, ia e pei o nai mea ia. E ese le asiasi e tatalo, ese le asiasi e na ona alu e faamaumau ai le taimi o le gasegase. Ia e tatau foi ona toe alu e vaai po o a mai le Taitai.

Ia manuia o la e faafofoga mai, soifua.

FOFOGA FETALAI: Ia, ou te iloa o lea ua lava ma totoe ia fautuaga a Minisita i lau afioga Sa Tuala. Ia e aoga, o le tatalo lava le mea e pito i sili ona taua. O le auupega foi lena e fesoasoani mai ai le mana o le Atua aemaise lava e o mafatia.

O le mea lea, o lea ua e faafofoga mai. Ia ua aoga foi lou laga o lea mataupu, o lea ua tutulai mai ia afioga i Minisita, ia o lea foi sa la asia ia le faatafa gasegase o le afioga i le Taitai o le Itu Agai.

Ia ua manatu foi, ia ua maea foi lou taimi. Ia o le mea lea, ia faauma maia, ia o le a tuu atu ia le avanoa e faauma mai lau saunoaga ua maea lou taimi. O oe o le sui usufono matua o le sui usufono tuai o le Maota ua e silafia ia tatou Tulafono Tumau ua uma lau 30 minute. Ia faauma mai lau saunoaga.

Afioga PESETA VAIFOU TEVAGAENA: Lau afioga i le Fofoga Fetalai, se o au e tumu i le ava ma le migao. Ioe, ae o le agaga faafetai, o le agaga fiafia lea na mafua ai ona ou avatu mataupu nei. Ua faafetai foi i si ou uso a Minisita, aua o lea ua tulai mai le afioga i le Minisita o le Soifua Maloloina, ou te le iloa pe na alu e asi ia le toeaina pe leai.

Ae e pau lava lea o le mea ou te faafetai ai i le Minisita o Faatoaga, leaga o lea na ou vaai i ai ma ma mafuta. Ma e ou te talitonu foi, e pau o mea e aumai e le Atua. Ioe o upu lava lea a le Susuga a Tuilaepa ina ua feiloai mai Laauli, se faafetai, faafetai Laauli ua e afio mai. O lea foi e nofo mai Peseta tulou o lea ua ou taua atu le igoa e faamalulu atu o lea ua taoto lau Tulafono Tumau, ae ona o upu na saunoa ai ia le Taitai, e le mafai la ona ou toe seua upu, ae o le agaga faafetai o le Taitai, ia atonu e tasi lea mea na ou vaai atu ua soisoi ai ma lototele le Taitai.

Na afio mai ia... aua ou te iloa o ia lea e faapea ai nei mea. Ioe, ae ui i lea, ia lau afioga i le Minisita, ia o oe lava o le uso. E tatou te faapenei faapena, ia e leai e faapena lava uiga o le tulaga lea e i ai ia lo tatou vanonofo. Ae o le agaga faafetai, ia ua sologa lelei foi le soifua maloloina foi o le Taitai o lenei Itu, ia atonu foi e tele la outou galuega o la outou tatalo. Ioe e momoli atu ai le agaga o le faafetai.

Ia o lea foi ua e saunoa o oe e te alofa tele ia te au, ia o le mea la lea lau afioga i le Minisita, afai e moni lou alofa, aumai le \$200,000 se i amata ai le Ofisa o Puapua e faatino ai ia lo matou itumalo.

Ia ona ou oo mai lea i le afioga i le Sao Alii, lau afioga Tuala Tamalelagi, ia e faigata leaga o oe ou te faaeteete tele i ai o oe lava o si ou uso tuofe. O le paia ia te oe Sa Tuala, faamalo faafetai. Ia lau afioga, ia se i toe silasila ane lava i le tele lava o le tulaga lea o le teuteuga o le Tulafono, ia ae ou te manatu o le a le oo i ai sou leo. Ioe ona o lea ua uma ona malele lau afioga i le Fofoga Fetalai se i faamaea le Tala o le Tupe, ia a i ai ni isi vaega atonu o lea o le a taatia mai e i ai se taimi ona avatu ai lea o sa matou faamatalaga.

Ia lau afioga i le Tamaitai Palemia, lau afioga i le Saofaapito, ia e momoli atu le agaga fiafia ma le faafetai. Ioe, faafetai i galuega ma le Fono amata o le Palemene, ia tatou viia le Alii. E ui lava foi ina feagai ni isi atumotu o le Pasefika ma tulaga fita ma faigata, ia faafetai i le Atua o lo o malupuipua pea si o tatou atunuu.

Ia tuu atu pea le faamanuiaga a lenei itumalo i lau afioga, ia tatou tuu i luma o le Atua le faamoemoe o le tatou Faigamalo. Ia talu ai ona o lea ou te vaavaai atu lau afioga i le Tamaitai Palemia, o lea e i luga o le Laulau a Fono suiga ia o le Standing Order, o tatou Tulafono Tumau. Lau afioga i le Fofoga Fetalai pe mafai ona ou oo i ai pe faataatia lea tulaga?

FOFOGA FETALAI: Ia, o lea ua faaiu atu lou taimi lau afioga i le sui usufono mamalu. Ia i ai se taimi tatou oo i ia tulaga, ae faaiu mai le saunoaga.

Afioga PESETA VAIFOU TEVAGAENA: Ia faafetai, o le a faataatia la le tulaga lea lau afioga, atonu se i i ai se taimi ia ona avatu lea o se... na o sina faamalamalama lava i le teuteuga lea ua aumai nei o tatou Tulafono Tumau o le Maota.

Ia lenei itula ia, e le tele lava se leo o lenei itumalo. E pei lava ona faafofoga foi lau afioga i le Minisita o Tupe, ia e momoli atu le agaga o le faafetai, avatu foi le lagolago o lenei sui usufono ma lenei itumalo i le Tala Faatatau o le tatou Tupe. E pei lava ona ou avatu i le amataga, ia o lea ua aumai ai ia suafa foi o le Komiti, ia o lona uiga o lea ua taoto i se tulaga lelei.

Ae pau lava lea o si tuualalo, toe silasila ane lava i tulaga foi lea o lo o i ai ia tupe ia o mea e tau o retention a kamupani po o konekarate. O lea ou te talitonu o lea e ta te tau fai sailiili pea le tatou Malo o a lava ni resources po o a foi ni alagatupe e maua ai nai nisi seleni e fesoasoani i le tautuaina o le tatou Malo, ia toe silasila ane lava i le tulaga lea, ona ou te talitonu sa ou talanoa muamua i le tulaga lea, i mea ia tau retention ia o tupe ia e tipi ese mai i konekarate.

Ae i lau lava vaavaai ma lau matau e pei foi o la atunuu, pe le tatau ona silasila foi i ai lau afioga i le Minisita, ae e tatau ona aveese. E tatau ona aveese le 10% retention lea mai i lalo o aiaiga o konekarate nei, ae ua tatau ona fai se 10% maintenance fund a le tatou Matagaluega o Galuega ia pe o le tatou Malo e tua i ai le Malo. Ia aua o le mea moni lava i le fund lea, o lea e tele lava ina toe ave i kamupani ia latou seleni.

Ia ona o le tulaga ua ala ona ou raise ina ai le issue lea, ona ua malosi lava le suiga o le tau lea ua iai. Po o le a lava le lelei o galuega e faatino ae a uma nei le taimi foi lea o le 12 months period lea aumai term o le retention, ona avatu lea o le tupe lea i le kamupani, ia ae tulai mai afa po o matagi malolosi po o mafuie toe faaleaga uma nei galuega, o lona uiga, e toe alu lava tupe a lo tatou Malo e toe maintain ai le tele o galuega nei. Ia na ona tuu atu pea le tuualalo i lau afioga i le Minisita ia e moi lava o se mataupu foi e fou foi i se faafogafogaaga a lau afioga, ia ae o se mataupu taua.

FOFOGA FETALAI: Ia faaiu mai le saunoaga a le sui usufono mamalu, ia e manumanu lava i lo tatou taimi. O lo o lava foi le taimi e toe fesootai ai i le Minisita, ia ona o lo o tau tuli ia le tatou taimi.

Afioga PESETA VAIFOU TEVAGAENA: Lau afioga i le Fofoga Fetalai, ia talu ai ona o lea ua maea lou taimi, tau ia ia faamanuia le Atua i le Fono amata o lenei tausaga i lau afioga i le Fofoga Fetalai, ia faapea foi lau afioga i le Tamaitai Palemia, afioga i le Sui Palemia ia faapea foi le Kapeneta ma le mamalu o lenei Palemene.

Ia faamanuia le Atua i le amataga o le tatou Fonousu i lenei taeao. Ia soifua ma ia manuia.

FOFOGA FETALAI: Ia malo faafetai, ia faafetai mo lou sao lau afioga i le sui usufono mamalu mai Faasaleleaga Nu.5. Ia e pei lava ona matou fai atu o oe o se tasi sui usufono matua o le Maota. Ia malo foi le tofa faatamalii ma le tofa faatama aua foi le agai i luma o le tatou galuega. O lea ua taatia mai lou finagalo i le afioga i le Palemia ma le Kapeneta, ia talitonu o lea o le a silasila i ai mo le agai i luma.

Ia mo le silafia, i Tulafono Tumau ia na tau sauva mai i lau saunoaga, e le o i ai se fuafuaga faapena a le Maota mo le teuteuina o Tulafono Tumau. O lea e manino atu i inei e le o i ai se tulaga faapena mo le silafia.

Ia o le avanoa lenei mo se tasi foi o tatou sui usufono o lea e lava ia le tatou taimi ae tatou te le i malolo i le malologa i le aoauli. E lelei foi le felafuai o le tatou galuega.

Ia o lea e matau atu o lea e tau fou mai le sa o Salega Nu.1. Ia tulai maia lau afioga i le Minisita Lagolago sui usufono mamalu mai i Salega Nu.1.

Afioga FEPULEAI FAASAVALU FAIMATA SUA (Salega Nu.1.): Faafetai mo le avanoa lau afioga i le Fofoga Fetalai aemaise foi o le tapuaiga mamalu a lau afioga i le Tamaitai Palemia ma le mamalu o lau Kapeneta. E ui foi ina faataotolia le afioga i le Taitai o le Itu Agai i gasegase o le tino se i tulou. E faatalofa atu foi i lenei itu o le Maota, afioga i le Sui Taitai, afioga foi i sui usufono o le Palemene, aemaise foi o le tapuaiga a Samoa i ona tulaga faalupe, afioga i Le Ao Mamalu o Le Malo o Samoa, aemaise le Sui

o le Fono a Sui Tofia, mamalu o le Faamasinoga aemaise foi le tapuaiga a le aufaitatalo a Samoa. E le gata i lea o le tapuaiga a sui usufono mamalu a itumalo taitasi i ona tupu ma ona ee, faletua ma tausī, saoa e oo lava i le malosi o nuu ia ma fanau. Ofo alofa atu foi i le tapuaiga a si ou itumalo.

Ae avea lenei taimi e faamalulu atu ai i lau afioga i le Fofoga Fetalai ona o le le paau mai foi i le usugafono ananafi o lenei itumalo e tusa ai foi o le faailoa o se auala i le Tulafono Tumau foi o le Maota faailo i lau afioga, ona o le valaau paia a le Atua i le tama po o le sao o lenei aiga i totonu o le itumalo. E avatu ai foi ia faamaisēga i le tina ma le fanau nofo faanoanoa, le paia o le aiga, a o le afioaga o le Toatolu o Alii Sa Leutogi ma le Matua, ia o le tapuaiga a le aufaitatalo ia ma si ou itumalo o Salega Nu.1.

Ae fai ia lenei avanoa e avatu ai se lagona o le itumalo e tusa ai ma le usugafono. E momoli le agaga faafetai i le Tala Faatatau Faaopoopo o le Tupe i lenei foi vaega o le tausaga e tusa ma le fono amata .

Lau afioga i le Fofoga Fetalai, o le agaga o lenei itumalo e lagolago i le Tala Faaopoopo o le Tupe, ae na o ni vaega laitiiti lava e tuu atu e tauala atu i lau afioga agai i le afioga i le Minisita o le ala lea o le tulai atu. E vaai alofa foi i le afioga i le Minisita o Tupe, ia e utiuti le faasoā, e tauauau lava maa o le mativa, ia ae o lau faasoā ua lava ma totoe, ia ona o le faasoā ua e faasoā tina tulou, aua le lufilufiina o le tamaoaiga o Samoa i lenei foi vaiāu o le pesi o le faamai o lo o feagai ai Samoa ma le lalolagi atoa.

Lau afioga i le Fofoga Fetalai e tauala lea i le tuualalo i le Minisita o Aoga. Na ou faitau ananei i le lipoti lea faaletausaga Matagaluega, o se lipoti e sili ona taua i lau lava faitau. Ae i le maea o le tapenapenaga, matagofie le tapenaga. E taua ia i le faitau atu o lenei lipoti o lo o i ai ni vaega taua. O ia vaega taua o lo o sau ai e faapea o ni sini autu. Ia ona ou faaaogaina lea vaega e fai ma fesoasoani ia ma tauala atu ai se finagalo po o se manatu o lenei itumalo.

E i ai vaega taua e tatau ona ou fesoasoani atu faamolemole lau afioga i le Minisita o Aoga, ona o le tulaga lea e matau atu i le anavatau a le tatou vaega, o le tatou Faigamalo o Aoga Amata. E matauina e lou nei sui usufono ma lenei itumalo, o le tele o Aoga Amata i totonu o afioaga ma nuu e mafuli lava i Ekalesia. O le faataitaiga pe 3 Ekalesia i totonu o lou itumalo e tofu lava le Ekalesia ma lana Aoga Amata. Ia ae o le manumanuga, ona e totogi uma e le Faigamalo po o le Malo ia Aoga Amata e tusa ai ma le tatou vaaimamao.

Ae a pe a tuufaatasi ia Aoga Amata i lalo o le faamalu o Aoga Tulagalua ina ia tasi ai lava le Aoga Amata i totonu o le afioaga. Ia aua a faapea e tele ia Aoga Amata, o lona uiga o le a tau fai totogi uma ia Aoga Amata ia, ia ae o le a eseese foi ia ni aoaoga. Ae taua ia o Aoga Amata ia e fai e faiaoga, e mafai ona i lalo uma o le faamalu o le Tulagalua, ia nei Aoga Amata, ina ia tasi ia lona Pulega, tasi foi le faasinomaga, ina ia tasi foi le Pulega, ia

mamalu ma matagofie, ma ia sologa lava aoaoga a tamaiti se i tau i taunuuga o le faamoemoe.

O le isi vaega lau afioga i lau matau i ai i vasega laiti, o le tele o nai tina ma nai matua, e agai i faleaoga ona o le aveina o fanau laiti lea e i le vasega 1, 2 ma le 3. E pei o i i vasega ia e tele ina agai ai matua i faleaoga e nofonofo ai ma tapuai, e tamoe mai ia le tamaitiiti i fafo, tamoe i totonu e fia vaai i ona matua. Ia o se tuualalo, manaia foi le tuufaatasi ma Aoga Amata ma vaega ia e toa 3, ina ia maopoopo ai le vaega lea, ia ona ese lava lea o le vaega lea mai i le vaega matutua.

O le isi talosaga lau afioga i le Minisita e tauala atu i lau afioga i le Fofoga Fetalai, na ou i lou itumalo i le tausaga lea na tea nei, na matou faasoa ma le Komiti Aoga ma le Pule Aoga, ona o tulaga tau initaneti po o auala o fesootaiga. Ia e oo mai lava i le taimi nei o lea o le a toe ae aoga, e le o lelei lava le fesootaiga lea i totonu o Salega atoa tulou lava le afioga i le Minisita o Galuega. Avea ia lou leo e faaleo ai ia aoga a lo ta itumalo, ona e le o lelei ia fesootaiga faaneionapo, faainitaneti. Na ou alu atu o pefua, e le o lelei le ea malulu, ia ae le o ola ma se mea e tasi. Faamolemole lau afioga i le Minisita pe mafai ona toe silasila ane i ai, uma lelei le tausaga lea na tea nei e le o faaaogaina. O lea foi o le a alu atu lenei tausaga, ou te faamoemoe atu i lau afioga lea sa tu i le foe aua le aoaoina o fanau a Samoa i Salafai.

O le tulaga lava lea i le aoga i Salega, na matauina foi ma talatalanoa ma le komiti, ia aemaise foi o le Pule Aoga ona o le igoa la e igoa ai si o matou aoga Savaii Sisifo. Ia o le tuualalo i lau afioga i le Minisita pe a tusa ai ae a pe a sui loa ia Salega College po o le Kolisi o Salega ona o lo o tu tonu lava lea Kolisi i le ogatotonu o Salega. Ia ma o lo o pola puipui foi e le paia o le itumalo ma le afioaga i Sagone tulou. Ia e mafai foi ona faafaigofie i faamaumauga ma fesootaiga ia mai i lea itumalo i lea itumalo.

Ia ona oo mai lea o se tuualalo ma se talosaga i lau afioga i le Minisita o Galuega, ia ou te talosaga atu, ou te manatu silafia e lau afioga o lea sa e afio atu ma faafeiloai le la itu o le itumalo, o si ou nuu lea o Siuvao, e oo mai lava i le taimi lenei e le o i ai se ofe paipa e alu ai se suavai i totonu o Siuvao, ae ova na le 100 tagata o lo o nonofo i Siuvao. E leai se ofe paipa mai lava ina tutoatasi Samoa e oo mai i le aso nei ou te tu atu ai, e molimau lou itumalo ma tagatanuu o Siuvao, e leai se ofe paipa e alu ai se suavai i Siuvao. O lo o talitali lava le suavai mai i le lagi ia ma faaaoga taavale e agai mai i Fagafau e tau avatu se suavai. Ia o le tatalo i lau afioga i le Fofoga Fetalai, e tauala i lau afioga i le Minisita, faamolemole pe a lava lau faasoa i se taimi, ia manatua ane nuu o le itumalo ia mo se suavai mo i latou faamolemole.

Ia o le isi vaega lau afioga, na ou i Savaii o le tele lava o taimi ou te alu, ia ua pei o le o a vaalele le o a taavale, ia o luma tonu lava o le falesa Taiti o le Ekalesia EFKS i Faiaai faafesagai ma le fale o le Maota o le galuega a le Metotisi, o le pioga lea, ua 4 tamaiti Faiaai ua lavevea i le pioga lea. O le mafuaaga, e le lava se avanoa e savavali ai tagata po o tamaiti i le aoga i le

pioga lea, ona e lauiti ae tulou lava, e tofe i lalo le isi itu. Ia a omai la taavale fepasiai, ona le iloa lea e tamaiti po o fea le mea e o i ai. Ia o le ala lena o le lavevea o nai tamaiti.

Ia o le tatalo i lau Afioga i le Minisita, pe leai sina galuega alofa se i tau faalautele ai le vaega lea e savavali ai nai tamaiti, aemaise o tagata lautele. Ia ma sina patupatu i ina, se i tau taofiofi ai le sau i le atoa o le taavale i uta agai i lalo, pei foi o le patupatu lea ua ta alu atu ua i luma o le falesa i Fogasavaii. Ia, manaia tele lea patupatu, 100% le mea ua i ina. Ia, e talosaga atu foi i se patupatu faapena i lea vaega ona o lo o lavevea lava tamaiti i ina ona o le lauiti o le auala faamolemole.

Ia, ona oo mai lea o se talosaga a lenei itumalo ma se faafetai i lau Afioga i le Minisita o le Soifua Maloloina. Faafetai i le amanaia foi o le talosaga sa avatu i lena tausaga, ia ua matagofie nisi o vaega o le falemai i Foailalo, o lo o nopiai ai ma agai atu i ai le itumalo o Palauli aemaise o Salega Nu.1 ma Salega Nu.2, ia ua i ai se taavale faaolatotoga e agai mai ai gasegase i lea vaega ma lea vaega o le atunuu. Faafetai i lau Afioga i le Minisita o le Soifua Maloloina mo galuega lelei i lou taimi ua e tulai mai ai, e le na o Salafai ae ua faasafua lava lou alofa ma lou agalelei e ala i lau faasoa i totonu o Samoa atoa.

Ia, o se talosaga i lau Afioga i le Minisita o Tupe e tauala i lau Afioga i le Fofoga Fetalai, ona sa ou agai i Savaii i le tele o taimi, ou te alu lava e asi le ma Matagaluega ma le Afioga i le Minisita o Leoleo ma Falepuipui ma le Tinei Mu, ia se i silasila ane faamolemole. O le tele o taavale o le ma Matagaluega, mai lava i Asau ae omai i Lalomalava e utu ai taavale, ae o lo o i ai pamu a le itumalo lea. Se i finagalo malie faafaigofie ane, o nai tamalii foi o le atunuu o lo o tautua, e le gata i nuu, Ekalesia ma le itumalo i Asau tulou, aemaise o Tufutafoe, ia, pe le faaaoga ifo pamu ia faamolemole, faafaigofie ane ni pepa faaletulafono e faaaoga ai foi le auaunaga a nai na tamalii o le atunuu, ona e mamao le sau mai Asau i Lalomalava. Lona uiga a faapea e 5 lita e sau ai i Salelologa toe 5 lita foi e alu ai i tua, ia ua lusi atoa lena kesi po o lena penisini e faatino ai le auaunaga a le Matagaluega. E le gata i le ma Matagaluega, a o Matagaluega uma a le tatou Malo, i le Fui Mu, o le Falemai ma Faatoaga, o la e agai i le la itu o le atunuu e faaaoga mai ai faamolemole lau Afioga i le Minisita.

Faafetai foi i le matou Matagaluega i le asiasiga i Salafai i taimi o aso fiafia, leai ni faalavelave tutupu, ua malu puipuiga i luga o le auala aemaise lava o le saogalemu lautele o tagata lautele aua le feagai ma aso fiafia.

Ia ou te manatu o le aotelega o le tautalaga a lenei sui usufono, e momoli le faafetai i lau Afioga i le Minisita o Tupe mo le tapenaga o lenei vaega atoa o le Tala Faatatau Faaopoopo o le Tupe.

Ona avatu lea o se manatu e faaiu atu ai, lau Afioga i le Minisita o Faatoaga, ia o le tatalo lava a lenei itumalo, a lava lau faasoa ia manatua ane Salega Nu.1, ia ma Salega Nu.2, i lau faasoa mo le faaleleia o niu toto i le matou

itumalo, avatu ni nai niu faaopoopo e tau fai ai ni faatoaga, ona ua faaleagaina lava le tele o niu i le faamai faalafua pei ona lamatia ai le soifua o laau toto.

Ia, o se manatu lea ma se lagona o lenei sui usufono, o le autu, matou te lagolago i le Tala Faatatau Faaopoopo o le Tupe i le amataga o lenei tausaga. Malo faasoa. Faafetai foi i lau Afioga i le Palemia ma lau Kapeneta, e le faigofie outou faiva alofiaao aemaise foi le tapuaiga ma le tuualalo a le Maota nei. Ia manuia lava le usugafono. Faafetai i lau Afioga i le Fofoga Fetalai. Ia manuia le usugafono i lenei aso, agalelei mai le Atua. Soifua. Ia manuia si ou itumalo ma lau tapuaiga.

FOFOGA FETALAI: Malo faafetai. Malo saunoa i lau Afioga i le sui usufono mamalu, atonu o lea foi ua faafofoga le Maota aemaise foi o le Afioga i le Palemia ma le mamalu o le Kapeneta aua foi mea ua taua. Ia, na o se fesoasoani lava i le sui usufono mamalu, ona o lea e taua faalavelave tutupu i Faiiai ma taua ai pei a matatau ai le Maota ma le tatou atunuu. E lelei o lau Afioga foi o le Minisita Lagolago o Leoleo, ia atonu o le a e fesootai ifo i le Afioga i le Minisita ina ia faailoa mai lea mataupu, ia po ua i ai ni moliaga o nei faalavelave e tulai mai i lea itu o le tatou motu. Ne i te i ua fefefe le tatou atunuu e feoai i lea itu ona o le faaaliga a lau Afioga i le sui usufono mamalu. Ae talitonu o le a lua fesootai ma le Afioga i le Minisita, faalaualelei mai lea tulaga ma le agaga faaaloalo.

Ia, o lea lava e totoe le tatou taimi, o lo o maua foi le avanoa mo se tasi o sui usufono e fia sausaunoa.

Ia o lea ua matau atu o lea ua fofou mai le sa o le sui usufono mo Faleata 4, le alii matua le fetalaiga ia Ale. Ia o le avanoa lenei o lau Afioga i le sui usufono mamalu.

Tofa ALE VENA ALE (Faleata 4): Faafetai i lau Afioga i le Fofoga Fetalai ua maua se avanoa o lenei sui usufono aua lenei taeao ma mataupu ua i lumamea o le tatou fonotaga i lenei taeao. Ua ou manatu ou te tu atu i le taimi lenei ina ia silasila mai Samoa ma le lalolagi ma le tatou fonotaga, leai o lea lava e i ai Ale i le fonotaga a le Palemene, amata mai ananafi ina ua usu ma nei i le aso. Samoa, ia o lea ua outou molimauina, e le faapea ou te le i fonu, o lea ou te fonu. Ia o le faamaninoga muamua lena, e te faamalulu atu i lau Afioga i le Fofoga Fetalai i nisi foi o saunoaga na afea ai lou nei sui usufono i le le auai i taimi o fonu. Ae ou te lagona o le matafaioi lea ana saunoa mai lau Afioga i le Fofoga Fetalai, a o le saunoa o le isi sui usufono i le isi sui usufono, ae tapuai maia lau Afioga. Faafetai.

Ia, o lea ua mautu i le lagi aua le Atua ma Lana faafofogaaga i le tatou taulaga molia i lenei taeao na taitaiina ai tatou e lau Afioga i le Fofoga Fetalai. Faafetai mo le tatou tatalo i lenei taeao. Ia tau ia ina ia liuliualo maia fofoga alofa o le tatou Matai Sili i le lagi ina ia auina mai Lona Agaga Paia

e tautoaluaina sui usufono uma o lenei Palemene aua lo tatou valaauina. Faafetai i le Atua, o le Atua o lo o faavae ai Samoa ma le tatou Malo tauatiae. O le Atua lava ia o le atoatoa o mea uma lava, e ati lana silafaga i totonu o outou finagalo ma o tatou faamoemoega uma. Ma e ao lava ona tatou faamuamua le Atua nai so o se mea tatou faia, aua a oo loa ina uio le Atua ma oo mai Lona toasa i le tagata na ia faia, ona tatou o faalologo lava lea i le tuugamau, tulou, o le upu e to ia te au.

O le mea la lea i lenei taeao lau Afioga i le Fofoga Fetalai, malo faafetai mo le tatou talosaga i lenei taeao. Ou te ofo alofa atu foi ma faatalofa atu i lau Afioga, malo le faatoatoa malo foi le pale, malo le onosai. Ua matauina lava ma le totoa lou faafoefoeina malie o le maemae foi o le tele o sui usufono ma lenei foi Paeaiga. Ae malo lava le tofa i lau Afioga, maua pea lou finagalo aua le faatautaia o fonotaga a le tatou Palemene.

Ia ou te ofo alofa atu foi ma faatalofa atu i lau Afioga i le Tamaitai Palemia lau Afioga i le Sao Faapito, lau Afioga foi i le Sui Palemia ma le Aiga Kapeneta, faapea foi Minisita Lagolago, ia ma lena foi itu o le tatou faigamalo ua pale mai nei e faatautaia le sa o Samoa aua lenei Paeaiga Lona XVII o le Palemene.

Ia, ou te ofo alofa atu foi i le Afioga i le Taitai o lenei Vaega o lo o maua i tino ma'i, ia alofa le Atua ia faafualoa lou soifua aua foi lou tiute aua le taitaiga o le tatou Vaega Faaupufai, faapea foi lau Afioga i le Sui Taitai ma sui usufono mamalu uma o lenei Palemene aua le tatou galuega.

Ou te faatulou atu i le paia i le afio o le Afioga i Le Ao Mamalu o le Malo ma le Masiifo, e faapea foi lau Afioga i le Sui o le Fono a Sui Tofia, lau Afioga i le Faamasino Sili faapea foi le Afioga i le Peresetene o le Faamasinoga o Fanua ma Suafa, alii ma tamaitai Faamasino o le Faamasinoga Maualuga e faapea foi le Faamasinoga o Fanua ma Suafa aua foi la outou matafaioi. Ia, malo lava le galulue, malo foi le onosai aua le tautuaina o le tatou atunuu.

Ou te faatulou atu foi i le tapuaiga a Samoa aua Aiga ma Tama, o Tama foi ma o latou Aiga, Tumua ma Pule, Ituau ma Alataua, Aiga i le Tai ma le Vaa o Fonoti.

E faapea foi le tapuaiga aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, le Tootoo o le Faleula ma le paia i le Manuatele.

E le gata i lea o le paia o le au ositaulaga, le Aiga o Sa Levi, aua faafeagaiga taulagi o lo o faatunapaulia i nuu ma afioaga, aua le tauasuina o le ipuvai o le ola, aua Samoa ma lo tatou atunuu.

Ia, e le faagaloina foi le paia o le tapuaiga a si ou itumalo, Faleata Nu.4, aua Ale ma Ulu ma o la aiga ma le Gafa o Aatoe ma le itulua o Satunumafono. E faapea foi lau Tofa i le Vaaulu. E faapea foi le afio o le alo o le Tuitoga, lo la toalua ia Lauaki ma Motuopuaa ma le falesatalalaua. Ia o le tatou itumalo lena faafaipule o le tatou falelua. Ia malo lava le tapuai,

faafetai ua tatou aulia mai le amataga o lenei tausaga. Ia e faamoemoe foi la outou sui usufono sa outou maua se kerisimasi fiafia ma se tausaga fou manuia, o lea ua tatou savalia lenei tausaga fou.

Lau Afioga i le Fofoga Fetalai, o mataupu uma ou te fia tuualalo atu ai i Afioga i Minisita ua manaoga o lou itumalo, e auala atu uma i lau Afioga i le Fofoga Fetalai. O mea uma lava e auala atu i lau Afioga. O le mataupu ou te fia tautala muamua i ai i le taeao lenei, o le mataupu lea i le poloketi lea o le \$1 miliona. E talu ai ona o lo o tuuaia pea au e nisi toaitiiti lava o le matou itumalo e faapea o le sui usufono lea o Faleata Nu.4, o lo o tetee i le poloketi lea. Ou te fia faamanino atu i le taeao lenei mai le Maota o le Palemene i Tiafau i le vaega toaitiiti lea e faia pea le sauniga lea i luga o upega tafailagi, ou te le o tetee i le poloketi o le \$1 miliona. I most welcome the \$1 million project proposed by this Government. Pau le mea na ou fesiligia ai i le uluai fonotaga ina ua tatou tauaofia, o taiala, o taiala e faatino ai le poloketi lea, pau lava lea. A o le poloketi, ia o ai se tagata faavalevalea e tetee i se \$1 miliona e aumai e atiae ai lona itumalo? Who? Not this sui usufono. O le mea la lea, aveese la na mafaufauga, e toaitiiti lava le vaega lea e faia le mea lenei i luga, lea ou te taumafai e faatu e latou le Komiti leaga o lea e tetee Faleata. Leai. O la ua uma ona tuu atu e Ale le sui usufono o Faleata Nu.4 i le tatou itumalo i alii Suafa e faia le tatou Komiti lea. O le mea la lea le tatou itumalo ia outou lea e faafogafoga mai, aveese loa na mea. O outou lea sa palota i le Vaega Faaupufai. A lea ua uma le tatou palota. O le a le isi mea tou te mananao ai? O le Malo lea ua pale mai, o le Malo uma lava o tatou, e le faapito manu ia tasi. O a finauga sa i ai nei, ua fano na taimi. O a uma mea, e le faapea a tu atu i inei i le Itu Agai ona le mafai lea ona talosagaina le faigamalo ua pale mai i le atiaeina o le tatou itumalo. E leai, o le matafaioi lenei a le sui usufono.

O le mea la lea i lenei taeao le tatou itumalo, o le lagona lenei, ma o le a i ai le faamoemoe o le sui usufono o le tatou itumalo ma le tatou itumalo e ave le faamuamua i le tatou faleaoga lea Primary School i Saina. Na pau lea o le faleaoga laupapa ma toetoe lava ina a tapuni i le tausaga lea na tea nei. O lo o taoto pea le tatou talosaga i le JICA, ma o le a i ai se taimi ona oooo atu lea i ai. A o le faamoemoe lea o le poloketi lea pe afai e talafeagai ma le tapenaga lea e i ai nei, e ave le faamuamua i le tatou faleaoga tulagalua lea i Saina. Ma o le fanua lea e i ai le tatou faleaoga lea, e 5 ma le afa eka. E i ai foi le faamoemoe o au nei e extend atu agai i tua, fai le tatou faleaoga Primary School, ae talosagaina i se taimi le isi vaega tele o le fanua lea e faatu ai se kolisi mo le tatou itumalo. O le mea la lea i lenei taeao, ia o le faamaninoga lenei i le tulaga o le mataupu lea pei ona i ai lenei taeao.

Lau Afioga i le Fofoga Fetalai, e pei lava ona ou talosagaina lau Afioga, o mataupu uma e faaalua ai ni manaoga o lenei itumalo i Afioga i alii ma tamaitai Minisita, e auala uma atu i lau Afioga.

Lau Afioga i le Minisita o Galuega lau Afioga Olo Fiti Vaai, ua uma ona ou tatalo atu i lau Afioga, i auala ia. O auala ia, e le o ni auala galue, auala lea e i totonu o le itulua o Satunumafono ma le auala lea e i Safune. Ua uma aualatetele ia e i Toamua lea e taamilo atu tau i le auala lea i Puipaa lea ua connect i o, toe pau lava lea. O auala ia Olo, e le o ni auala galue, o auala e agai ai i maota ma laoa. Ma e talosagaina lau Afioga i le Minisita e te alofa aumai lau faamuamua i i i auala ia e lua, o lo o uia e lou nuu ma lou itumalo. Ou te tatalo atu i lau Afioga.

O le auala foi lea i i i Saina, ia lea na fai muamua ou te le iloa po o ai le konekarate lea pei uma lava o le konekarate a Peseta ae leaga o lea e le o nofo mai i i. A e toe silasila i ai Olo faamolemole lava se i e alu ai lau taavale, ona e silafia lea ua matua leaga faia lava, ua le mafai ona toe feoi...

FOFOGA FETALAI: Ia, ou te vaelupeina le saunoaga a le sui usufono mamalu. Talu ai o lea ua o tatou taunuu i le tatou taimi malolo e muta ai foi le tatou galuega, ae o le a mafai ona faaauau lau saunoaga pe a tatou toe taliu mai i le afiafi a nanei, lea ua toe tolopo i ai le tatou fonotaga. Ua maea ona faamaonia e le Maota le lafo mo le suia o tatou itula fono mo le aso, faataatiaese ai a tatou taualumaga i le itula e 1:00 i le aoauli nei, tatou toe faaauau i le itula e 6:00 i le afiafi seia tolopo i le itula e 10:00 i le po nanei.

O le mea lea ou te faasilasila atu o le a faataatia ese Taulumaga o le Fono Aoao Faitulafono seia aulia le itula e 6:00 i le afiafi a nanei. Faafetai.

Na faataatiaese Taulumaga a le Fono Aoao Faitulafono i le itula e 1:00 i le afiafi seia aulia le itula e 6:00 i le afiafi.